

撫梁咨稿二卷目錄

咨議補大梁管河二道

咨報山險王輿難行

咨請扣舊餉解還鑄息

咨報杞縣太倉銀全完

咨雍都司領薊鎮秋班

咨留賈都司加銜久任

咨偃師縣熊教官辯復

咨睢陳道張廉憲加銜



谷補磁營練兵遊擊

谷議補儀葉二縣正官

谷巡河南王大叅留任

谷請折四年臨德倉糧

谷守大梁周廉憲加銜

谷保嵩縣張守備復職

谷議調蘭新二縣正官

谷張大叅開前任俸

谷提追姚光裕家屬

谷催湖廣絲價銀兩

谷催浙江馬價銀兩

谷提追羅爲紘家屬

谷催題豁潁川運軍

撫梁谷稿二卷

魏博郭 著

谷議補大梁管河二道

爲會省需人正亟酌議就近陞補以資彈壓以固河防事據河南布政使司呈稱切惟河南爲腹心重地而省城乃水陸衝區內列

藩封五方雜處設有分守道官統屬開歸二府東接潁亳齊魯之交西聯鞏雒雜鞏懷之境幅幘遼濶姦宄易生所賴資彈壓而戒不虞抑豪右而

安良善端于該道是望厥任重且要也若非謀
猷素裕才誠兩合詎克仔肩也者張大叅撫摩
與威稜兼施秋肅共春溫並濟警息萑苻民躋
衽席地方依戴正殷倏爾聞訃長往所遺道缺
最屬喫緊誠不可一日乏人者若候部推別省
未必人地相宜豈能時刻卽至省會重地急需
得人今照按察司管河道周右叅政才兼文武
望重斗山中流砥柱孤操千仞振衣峻品典文
衡門盈苑李督河防績茂平成俸已及期超擢
伊邇若以就近陞補大梁守道加以按察使新
銜資保障于梁宋之間壯藩屏于都會之地所
稱保釐旬宣允克經濟者也至于管河一道
陵運攸關每歲伏秋之時會計修築之舉畚鍤拮据
胼胝殫勞尤難時刻懸缺者查得開封府知府
瞿士達壁聳千尋氣槩刃游八面才鋒屬凜紀
綱人依召杜德政久騰于汴上芳猷丕振于天
中瓜期久逾序轉非遙闔省士民同口一詞保
留爲地方借寇若以本官就近陞補河道副使

必能功成疏濬績奏安瀾上於

陵運有裨下保省會無虞所謂兩賢並駕後先一揆均與人地相宜且朝聞

命而夕受事併免迎送之勞咸有得人之慶蓋爲地擇人非爲人擇地駕輕就熟計無便于此者亟宜俯從以慰輿望合無請乞詳示特爲咨

部兩相陞補庶彈壓得人而河防有賴矣等因呈詳到職據此會同 總河部院李 巡按河

南監察御史楊

爲照大梁守道設居會

統轄兩府延袤不下六百餘里幅幘旣廣奸宄易生况今歲旱蝗頻災人心靡寧所資彈壓撫綏誠不可一日乏人者張大叅聞訃已去卽新推未必遽來今管河道右叅政周鏘英猷勁節定力貞心劬勩勞瘁獨肩擔當宇宙在手管河已著成績分藩定懋新猷若以陞補守道洵稱得人所遺河道一缺專管防濬時議修築任綦重矣尤不可旦夕懸者今開封府知府瞿士達粹白三秋月皎嚴明九夏霜飛澤沛撫摩表端

師帥且歷俸已逾三年之久治聲又爲兩河之
最前已請補河南巡道因咨稍遲推陞有人今
番宗室鄉紳士民靡不公呈借寇皇皇如失慈
母若以之陞補河道于資格無踰越于羣情爲
暢快且俱可刻期到任地方無廢弛之虞免迎
送之費委屬計之便者旣經該司呈詳前來擬
合咨請爲此合咨 貴部煩將二官就近陞補
庶于
國計民生均有賴矣

一 吏

咨 部

天啓六年十二月初七日

容報山險王輿難行

爲欽奉事據分巡河南道呈據河南府呈蒙本
道紙牌准布政司移會蒙本院憲牌准

工部咨天啓七年三月十一日

瑞王之國天啓七年三月二十二日

惠王之國天啓七年四月十七日

桂王之國等因題奉

聖旨是欽此欽遵合咨前去煩爲查照兵部題奉
欽依內事理即便轉行司道嚴督司道府州縣衛將

三王之國經繇水陸道路橋梁上緊修整應留船隻按期催押前來毋悞

欽限至于應行事宜悉照

福王之國例行等因移咨到院牌仰本司官吏照牌事理即便移文河北河南管河各道各將親王之國經繇水陸道路橋梁舟車上緊修整備辦毋得耽遲稽悞未便等因蒙行到司移會到道牌行到府已經遵依轉行催督外又蒙本道批牌蒙本院憲牌爲

藩邸告成等事照得

親王之國吉期已迫應繇路徑

部文雖未指定然移文中州似繇雒澗陝關達漢一切棚殿夫馬等項業已行文備辦及查河雒迤西有峭函硤石之險谷壑相逼道路曲折車乘不得方軌馬匹莫可方列

王輅所至儀從雲擁倘有窄峽陡坂水衝路斷之處不無阻滯之虞合行查勘預修爲此牌仰兩道官吏照牌事理即便轉委才幹官一員前赴

新安澗池陝州靈寶閿鄉一路查其路徑但有
崎嶇缺壞之處就便撥派官夫極力修理務使
平坦寬闊無阻無礙方爲停妥先將查勘過應
否修築緣繇飛報查考毋得時刻耽遲未使等
因到道蒙行到府申委本府清軍同知張應誥
查勘督理外今據陝州申稱除遵節次原行催
造棚殿地名圖樣并每棚應用各項物件價值
等項緣繇急行備辦去後該本州知州王家賓
看得棚殿之有定制也物料價值之有定數也
錢糧協濟之有定額也皆有

福藩之國之底本在可倣而行者卽往者儲備于
二三年間今止取辦于二三月內勿論本府屬
道里駐蹕之處十有三殿爲時急迫苦于工作
之相湊虞其難給也物力有限苦于貿易之不
通虞其難應也此猶彰明較著之費手者也至
于陝州原控峭函天險從觀音堂入硤石一帶
陡坡傾崎石骨磽确田車所過尚需數人相挽
而升一遇摧折未有不破轆斷輻者迤邐而西

爲分水嶺爲張茅鎮兩壁山岸如削居中僅一
鳥道仰觀數十丈傍岸又係深谷俯矚亦數十
丈人必有摩車難方軌

王者乘輿能飛度乎說者曰修之平之芟之夷之
策止矣夫愚公移山及于子孫精衛填海亦防
蟻穴以如彼之低昂相迥陵谷相遷旣非橋梁
可施又無長虹可駕雖唐之李泌止于分水嶺
鑿運道六里而力燿矣今安得有五丁神乎况
暴雨時作山岡水勢澎湃而來頃刻冲陷不可

以伊數測也又况陝東西相踞百四十里應樓
殿三座有半繇七里入疆偶有坦途縱不深長
而遷就營度或堪棲止自此而十里乾壕二十
里硤石經二嶠屐巉崖披蒙茸涉巢徑歷三十
里衛店嶺紆迴曲折甫得平原方能壘土爲基
焉又不可以一程規也自此二十里橫渠坡狹
路一線矣二十里州治轉城南而蘆溝跨雞足
而澗河疊石千障矣避之則坑坎中斷補之則
峻嶺復隔卽民房不知折去幾許畢竟無一直

用道如河北之能倚重較者又不可以人力衡也憲臺止慮接應之莫支而不先計道里之險夷止籌備辦之宜早而不揆行李之通塞將有棚殿物料而墊路之未易調停十倍于樓臺歲月之無遑假易百促于安置卑職若不具呈轉達條議爲地方請命爲

桐封萬全一時

賁臨其何及哉卑職有幾項踵堪罪責哉且潼關棧道接踵山谿又非卑職所能代畫也憲臺自有評謨書生不敢借箸然亦不得不言使預知之勿待至其地始訝其言不詳耳除圖樣另陳外理合具申等因到府據此又據靈寶縣申爲乞審地勢以預清除事伏蒙紙牌着令查造棚殿事宜凡應用什物容竭精料理至經過路途預宜修整竊照靈寶古函谷地志稱天險東接陝州鑿山爲路轍深成衢兩旁狹峻如築牆然之玄百折難可容車至西連閩鄉則崔巍崇嶺削壁臨河春夏河漲一徑斜纏山腰鳥道羊腸

莫踰其險且弘農一澗源衍維秦霖雨暴至怒
浪奔流橋梁旣斷舟楫莫施似此地勢遽議清
除實難措手等因到府據此該本府知府馬士
英看得

親王之國豈尋常使節之可比哉儀衛之盛宮眷
護從之多輜重充途車駟接軫非周行大道安
能無阻以周南言之其棚殿供億之費應以一
二十萬計物力之訕驛騷之苦姑不具論惟是
驛路自磁澗以西萬山盤鬱地險道隘已非坦
途漸入硤石則崎嶇之極上出山巔下臨絕壑
羊腸紆轉之處輕車小駟猶竭盡人力而况

王輿賁臨哉二嶠函谷古稱天險碾路如巖壘難方
軌飛林西去左山右河鳥道一線尤爲逼仄若
欲平治道途恐卽以數十年之力未竟此役也
况秦中復有棧道之險猿猴欲度而愁攀援者
乎且也靈寶盧氏之變雖定山林餘黨實繁有
徒嘯聚窺探比比而是棚殿搭于山野又無城
郭可資防衛儻輜重行李稍有不虞豈直守土

吏之責哉該州縣所慮猶職心也伏乞軫念區
處庶免致臨期悞事等因到道據此該本道看得
親王經臨關係匪輕而陝州東西自新安以及閔
鄉路徑險隘不可以人力芟夷者幾數百里卽
等閒車馬猶苦攀緣

親王乘輿豈堪跋涉乎該府詳計而熟籌之慮誠
周矣據呈前來擬合轉報等因具呈到院據此
案照先准

本部咨前事已經轉行司道等官上緊備辦并
專牌徑行該道委官修理道路務使平坦寬闊
去後今據呈報前因維時按院尚未入境該本
院恭照

親王就國海內欣聞
綸綍初至嵩河草木咸輝

鸞和將臨文武軍民胥慶誠爲中原之快覩更屬
今日之奇逢車騶

殿宇供奉之備業已嚴檄督理矣司道郡邑莫不
殫精竭力冀以克襄

盛事第自中州以達漢上惟峭函一線之途耳透
迤險阻十居其八峯迴路轉鳥道羊腸加以山
水時發歲歲衝崩以致經行之處斷岸參差窄
而更曲下臨百丈之壑削而且高上逼千仞之
壁在使客輕車之至率皆股栗而行若
王者千乘之臨詎能步虛而往鑿石填壑卽窮數
年之力恐不可以畢工靈虛餘孽乘間伺隙
猶其次也事干重大誼難緘默倘不預聞于今
日將必開罪于臨期擬合咨請爲此合咨

貴部煩爲酌議裁決仍希咨示施行

一 咨

工 部

天啓七年正月

十五

日

咨請扣舊餉解還鑄息

為民生

國計俱窮等事據河南布政使司呈蒙本院案驗
准

戶部咨河南清吏司案呈案查天啓六年八月
中奉本部送河南撫院咨准部文將河南樽省
鑄息銀一萬四千兩差官解赴貴州軍前犒賞
訖查係新餉司銀兩不准開銷該省欲于天啓
五年分舊餉照數抵解咨

部裁奪等因該本司查得天啓五年七月內雲南缺餉本部題奉

明旨動支天啓四年分舊餉銀六萬兩遵行在案除前奉 旨動支充餉外並無部文移會該省動支舊餉事理今該省欲以舊餉而抵新餉本司所未明也况舊餉乃九邊關係歲有定額安得以餉司不允遽欲以舊餉抵解爲請及查民生等事又係新餉司行文于舊餉毫不相涉合無容行撫院駁查鑄息銀兩係何年月日爲何名件解赴貴州開銷應否舊餉統俟咨報到部定奪等因呈堂蒙批照行蒙此隨照會該布政司去後今續准新餉司付稱前事等因到司准此查得前項鑄息銀兩若本司案呈動支應准開銷不待言者但查解滇充餉六萬兩之外並無動支舊餉文移緣何有誤充之理且該省初欲以五年舊餉內抵請解部因本司行查去訖今又欲以六年分舊餉請抵事屬那移難以允從况稽核舊餉原額原係本司職掌安容有悞應

否開銷亦當照去年行查事理一一根據申明
方可廼撫院竟移咨新餉司而不移咨本司者
令本司着落登報其中更是難知相應再行文
該省駁查鑄息銀兩爲何名件誤充黔餉貯俟
移咨到部之日另爲定奪等因呈堂蒙批照行
奉此案呈到部擬合就行爲此合咨貴撫院煩
爲查照來文內事理希轉行該布政司嚴查鑄
息銀兩爲何動支致使誤充希速回復施行等
因移咨到院案行到司蒙此該本司遵依備查
原行鑄錢利息初議各省所鑄皆充各省地畝
加派新餉之數

部文甚悉向因本省所屬唐縣等州縣加派銀
兩較舊額條銀尤重二三倍不等小民難堪隨
奉
戶部咨爲

國家萬非得已等事河南清吏司案呈本部覆該
戶科給事中羅尚忠題前事欵開唐縣派重緣
繇奉

青有撫按官卽與酌處之文欽奉原行蒙撫鄧按三
院會議具題將前項派重州縣量行減豁隨奉
部文內稱應減銀兩別議抵補無失原額等因
案行到司多方搜抵止查有五門商稅祥符太
康條銀及樽節變金新錢利息等項又蒙兩院
查有兵餉米價贖銀亦可抵餉共計湊銀二萬
九千三百兩總名爲樽省銀兩分抵唐縣等處
天啓三年一年加派偏重之數其二萬九千三
百兩內有天啓三年鑄息銀六千五百七十二
兩八分八釐三毫九絲七忽八微蓋遵照原行
鑄息准抵本省加派新餉之文議抵也蒙撫院
馮 鄧院蔡 按院梁 會題去後隨

于天啓四年正月二十一日蒙撫院案驗准

戶部咨該本部題專理新餉山東清吏司案呈
內開舊撫院贓罰銀二千三百兩今年贖銀八
千兩俱應解太倉舊餉按院搜括銀五千兩又
係應解新庫不得移抵此外止有樽節等銀一
萬四千兩可以准抵等因天啓四年正月二十

九日本部尚書李

等具題初三日奉

聖旨是欽此欽遵移咨到院案行到司遵奉訖細查樽省等銀一萬四千兩係兵糧支剩米銀四千兩五門商稅銀二千四百七十九兩四錢九分八釐四毫四絲二忽二微本司庫貯金變價銀四百七十一兩祥符縣拆封餘剩銀二百二十八兩三錢三分三釐太康縣樽節銀二百四十九兩八分一毫六絲新鑄錢餘剩銀六千五百七十二兩八分八釐三毫九絲七忽八微以上六項共足前樽省等銀一萬四千兩各項名件分析明白已經本司呈請撫卹按三院移文戶部暨餉院抵補唐縣等天啓三年新餉訖當時戶部全無異議覆奉

欽依在卷可稽也天啓四年正月二十九日蒙撫院案驗准

戶部咨爲入巢第五戰大獲全勝事該本部題貴州清吏司案呈戶科抄出貴州總督楊

題前事本部查將河南樽省抵補新餉銀一萬

四千兩德州倉額徵米折銀一萬六千兩共足
三萬之數題奉

欽依差光祿寺署丞江文藪解赴貴州充餉等因案
行到司遵將前呈允題奉

欽依樽省鑄息等六項銀一萬四千兩業于天啓四
年三月初四日眼同差官江文藪秤兌明白印
封入鞞解赴貴州布政司交兌訖蓋遵鑄息准
抵新餉之文非本司所敢擅行那借亦非誤充
黔餉也至天啓五年二月二十二日蒙撫院案
驗准

戶部咨爲鼓鑄之利已見等事專理新餉山東
清吏司案呈奉本部送准河南撫院咨稱煩爲
查照咨文內事理准將天啓四年鑄錢利息銀
兩抵解本省新餉正數等因到部查得錢息銀
兩本應抵派以寬窮簷但今遼餉虧額一百六
十餘萬苦無設處應咨撫院暫速起解以後鑄
息盡抵加派可也等因移咨到院案行到司遵
依解部訖是錢息之不准抵派始于天啓五年

二月也則三年鑄息先已解黔

欽准抵派部文昭然矣天啓六年七月二十日又蒙
撫院憲牌准

戶部咨爲民生

國計俱窮等事專理新餉山東清吏司案呈奉本
部送准河南撫院冊報該省樽省鑄息銀共一
萬四千兩業于天啓四年三月內准本部咨差
官江文敷解赴貴州軍前犒賞到部送司照得
樽省與鑄息銀兩均係遼餉母咨那移別用黔

省雖云在所共急遼餉那用一分卽缺一分且
動用遼餉必本司議准方行合咨撫院將樽省
銀七千四百二十八兩并鑄息銀六千五百七
十二兩速行照數補解以濟邊餉急需解赴貴
州犒賞者另于舊餉內開銷可也等因到院案
行到司遵依呈院在于天啓五年舊餉銀內抵
解已蒙咨

部訖候示起解間于天啓七年正月十六日又
蒙本院案驗准

戶部咨專理新餉山東清吏司案呈奉本部送
准河南撫院咨前事到司照得該省樽省鑄息
等銀一萬四千兩原屬新餉錢糧先經該省誤
充黔餉本司呈堂咨令前銀速行解部用之黔
事者當在舊餉項下開銷等因去後今撫院咨
請將六年舊餉抵解似爲便計相應咨覆星速
起解以濟榆關急需仍移付河南司俟解前銀
到日准于六年分項下開銷可也等因移咨到
院案行到司遵行間今蒙前因該本司看得樽
省鑄息銀一萬四千兩原奉

部文准抵本省加派新餉之銀也隨奉本部差
官江文敷將此項銀兩解赴貴州犒賞軍士訖
始于天啓五年舊餉銀內請抵鑄錢餘剩銀六
千五百七十二兩八分八釐三毫九絲七忽八
微等候明示間不意五年舊餉起解將完銀數
不足抵解隨請天啓六年舊餉內開銷抵解今
蒙行查請乞本院達

部仍移河南清吏司并專理新餉司會議妥便

俯賜明示在于六年舊餉內開銷抵解庶前銀
得以結局而文移不至煩瀆矣等因呈院據此
案照先准

本部咨前事已經案行該司查議去後今據呈
報前來該本院看得樽省錢息共銀一萬四千
兩題奉部覆

欽依抵充河南唐縣等處天啓三年加派新餉矣嗣
准

貴部坐名坐數移咨到院付差官江文藪解黔
犒賞訖然不知

貴部犒軍應用何項也如應用新餉則此銀解
之非誤如應用舊餉而誤用此銀則其誤在于
餉司行文之日河南院司不過查照

部文坐定名數以解耳咨稱本省誤充黔餉恐
未及細查來歷也相應咨復爲此合咨

貴部煩爲行移新舊餉司會議妥確或于新餉
內開銷免解或于舊餉內開銷還解新餉希文
過院以憑查照施行

一 谷

戶 部

天啓七年二月

十六

日

谷報杞縣太倉銀全完

爲懇乞轉申請查完欠錢糧事據河南布政使司呈據開封府申據杞縣申准本縣閔稱卑縣近閱邸報云杞縣五年分太倉銀欠二分及查卷案太倉銀兩俱照依布政司發下坐單逐倉解完于本年月日不等差該吏陳民高解訖取有批收附卷等情到府據此查得該縣天啓五年太倉原額銀一萬五千一百六十一兩六錢九分七釐四毫七絲八忽五微四纖業于天啓

五年十二月內委官本府知事鄭天栢解保定府易州倉保定府廣盈左右二倉涿州常盈倉農桑絲綿折京庫絹稅絲折京庫絹農桑絲綿折薊州庫絹山海倉古北口倉石匣倉延慶衛倉密雲龍慶倉保定府廣盈左右二倉派剽改太倉協濟昌平州以上十六倉共銀一萬二千五百三十六兩一錢六釐八毫七絲四忽八微九纖俱已解完取有批收附卷又于天啓六年四月內奉

戶部差官韓應魁取支太倉銀一萬二千兩買銅用內有杞縣居庸倉良鄉縣豐濟倉太倉銀庫草派剽改光祿寺密雲龍慶倉太倉銀庫草易州倉京庫折色布以上八倉共銀二千六百二十五兩五錢九分六毫三忽六微五纖本府差官起解并奉文取支完足前項原額之數并無拖欠等因具申到司據此該本司查得杞縣知縣李春旺經徵天啓五年分太倉銀原額一萬五千一百六十一兩六錢九分七釐四毫七

絲八忽五微四纖近閱邸報內云該縣未完二分及查開封府差委本府知事鄭天栢解過銀一萬二千五百三十六兩一錢六釐八毫七絲四忽八微九纖已于天啓五年二月內絲司倒文赴部交納獲批在卷外文奉

部文動支太倉銀二萬兩給付委官韓應魁買銅應用內有該縣太倉銀二千六百二十五兩五錢九分六毫三忽六微五纖以上差官并奉文支取過銀兩俱已完足原額銀數委無遺欠

等因具呈到院據此會同巡按河南監察御史鮑 看得杞縣知縣李春旺經徵天啓五年太倉額銀一萬五千一百六十一兩有奇委官鄭天栢解過一萬二千五百三十六兩零獲有批收又奉文動與差官韓應魁買銅銀二千六百二十五兩零計筭原數分釐無欠是以本官有此控顧也既經該司查明具呈前來擬合咨報爲此合咨

貴部煩查開封府杞縣知縣李春旺所徵解支

五年太倉餉銀果係足額希將原案註銷施行

一 咨

戶部

二月 二十二日

咨 雍都司領薊鎮秋班

請修扼要等事據河南布政使司呈准河南都
指揮使司咨蒙本院憲牌准總督薊遼部院咨
奉

旨督催天啓七年秋班官軍與春班借至已經牌行
都司並各道嚴催去後起行在卽忽聞領班馬
都閩以疾告終班政急迫將領缺人必待部推
誠恐稽悞無如就近議補爲便爲此仰司官吏
卽便會同都司在于附近地方或衛所衙門查

有資次相應才品堪任將領選擇一員作速會議妥確具呈兩院以憑覆酌會咨

題授統軍施行事急時迫毋得遲緩等因蒙此合咨前去請照咨文備蒙憲牌內事理煩查附近地方或衛所衙門查有資次相應才品堪任將領選擇一員作速查議妥確希速過司以憑覆酌轉呈兩院會咨

題授統軍施行事急時迫請勿遲緩等因准此又准本司咨爲舉保咨補賢能將官等事本年二

月十四日蒙本院批據睢陽衛蘄鎮秋班邊軍吳三等三千名連名稟稱本營馬都司忽然身故班軍催提起程急如星火見今缺將統領有本衛原任統領募兵援遼都司雍大綬赤心報國大畧長才本官在衛掌印十五年愛軍如子衆心深服援遼苦歷五載邊務素諳諸事練達遼東乃本官素所歷熟之舊地領素所畏服之軍人兩相傾心事咸克濟况且本官咨部候推見今在家懇乞准賜咨補前缺赴邊不至愆期

工程易于早完庶仁將得人軍心大慰仰望吳
三等負罪叩呼待恩上稟等情蒙批仰布政司
會同都司速查報蒙此案照先蒙本院憲牌爲
請修扼要等事備蒙已經移文會議去後今蒙
前因擬合再行爲此合咨前去請照先今咨文
內事理煩查原任統領募兵援遼都司雍大綬
果否素諳邊務應否堪任將領希速會議妥確
移文過司以憑覆酌轉呈兩院會咨施行等因
准此隨經備行睢陽衛查議去後今據該衛回
稱看得原任僉書都司雍大綬干城備噐細柳
長才握丹篆而德懷滿衛秉赤符而威宣榆關
祇緣遼事靡寧蒙兩院選委統領募兵先蒙天
津撫院畢 題授守備次蒙撫院李 題奏實
授都司僉書後緣奴鋒漸息奉

旨簡汰官兵併營清餉蒙 閣部孫 咨部另推討假
回家今蒙行查咨補薊鎮秋班况本衛疲壞日
久軍心莫得郭公以生色非本官威卯恐負其
雲霓之望也今蒙行查擬合呈報等情到司據

此尤恐不的隨該本司詳批雍都閫蒙

閣部孫 咨部另推係何年月彼時有無批照
據有咨文字樣否仰衛確查速報等因批行去
後本年二月二十一日又據該衛呈稱本司批
前事等因到衛蒙此遵依查得原任都司雍大
綬于天啓五年八月內咨部九月二十一日見
大堂投遞一呈批職方司郎中余 處次日給
假回家候推今蒙行查遵將

閣部孫 咨稿擬合呈報等因復呈到司據此
看得原任都司僉書雍大綬志切沉舟破釜氣
雄躍馬橫戈忠膽一腔英風八面統領募士貔
貅虎奔當關漸掃奴氛獫狁鼠迹遠漠軍心旣
同魚藻戎行應快雄飛齊聲借寇三千不約而
同衆口稱韓百雉可藉而繕似應還其舊物以
暢新猷者也屢經該衛確查前來相應回復爲
此合咨移復貴司請照咨文內事理將該衛
呈來咨部原稿及原領部劄請煩查照覆酌轉
報施行等因准此該本司會看得原任都司僉

書雍大綬韜鈴素諳謀勇兼資綰衛旌于睢陽
戎行愛戴統募兵于遼左卒伍皈依並負報國
之忠久蓄籌邊之策矧授實職分闡文經咨部
候推今據各軍同詞懇保其本官恩協人心德
服衆願槩可見矣旣經該司酌議前來似宜俯
從會咨補授卽將領班薊鎮以孚輿論者也等
因具呈到院據此會同巡按河南監察御史鮑
爲照秋班薊軍奉

旨與春班偕至邊工之浩大急迫可見矣出督發之
際偶爾將領缺乏若靜俟

部推恐諸軍統領無人邊工必至遲悞亦就近
選補不得已之勢也據議睢陽衛候任僉書雍
大綬堪當是任及查本官七尺扛鼎雄軀一腔
吞胡義膽技精沒羽望重長城原係
欽授僉書之銜似屬

貴部應推之職且官軍同聲求爲將主尤見賢
聲素著用之就近補任誠于上下相孚除已先
行暫委統軍星夜赴邊候

命外相應咨請爲此合咨

貴部煩爲裁酌如果本官可用希爲具

題實授河南都司秋班僉書就彼領班修防希咨

示施行

一 咨

兵 部

天啓七年二月 二十四 日

咨留賈都司加銜久任

爲懇恩保留賢能司官加銜久任以維軍政以
奠腹心事據河南布政使司呈蒙本院批據標
親二營中軍守備千把總賀諤等呈稱切照兩
河腹心重地眷城都會要區十三衛所之戍卒
全賴司閩省磁各營之武備總屬提攝控制有
方能使旌旗耀色駕馭得體頃令壁壘生輝今
照掌印賈都司將門世胄汴上福星仁智蕪咨
惠溥官兵挾纊恩威并濟膏流軍士投醪其嚴

備城守屹然北門鎖鑰飭築堤垣儼然拱護金
湯各衛番上之兵按期而赴修防爲之有賴各
營朋貯之銀隨請隨發營馬不至缺失官兵依
藉正殷忽報陞轉他處羣情攀轅稱戀稱切萬
懇洪恩軫念武備型範俯鑒衆心歸服特賜咨
題加銜久任庶營衛有二天之慶而中原資保
障之安矣等情又據宣武衛城操指揮同知毛
崇燧等呈爲懇恩保留賢能司官以衛中原以
維軍政事切照中原軍民雜集之所奸宄易生
之源軍馬疲痺城垣圯墟士常失伍者八九軍
貧竄役者十三自掌印賈都司蒞任以來教化
軍兵樂于聽聞惠感操卒常且懽怵而城垣不
遭踰越之登軍兵弗懷相對之怨惻隱下頒羣
戍沾恩慈祥一布衆士啣仁方今陞轉不惟各
官夫望抑且士卒如失怙恃矣伏乞天恩俯憐
官軍疾苦比照陞任都司張夢鯉加銜叅將仍
管都司事務垂恩代表奏保留中土官軍甦生不
惟中原心腹有賴而城廓不遭窺伺矣等情又

據宣武衛城操馬步軍士楊鳳鳴等稟爲籲天
比例保留賢能方面以蘇行伍事五門守巡城
兵劉銀陳柱等稟爲懇天保留方面以實軍政
事汝南二衛班軍衛總徐進儒李守志等稟爲
懇恩保留賢能官員事等情俱粘連蒙批仰布
政司會同按察司查議報蒙此又據本司經歷
司呈抄蒙巡按河南監察御史鮑 批據宣武
衛城操指揮同知毛崇燧等呈爲懇恩保留賢
能司官以衛中原以維軍政事蒙批布政司會
同按察司查報等情又蒙本院批據標親二營
中軍守備千把總賀諤等呈爲懇恩保留賢能
司官加銜久任以維軍政以奠腹心事五門守
巡城兵劉銀陳柱等稟爲懇天保留方面以實
軍政事宣武衛城操馬步正軍楊鳳鳴等稟爲
籲天比例保留賢能方面以蘇行伍事等情粘
連俱蒙批布政司會同按察司併查報等情又
蒙本院批據汝南二衛班軍衛總徐進儒李守
志等稟爲懇恩保留賢能官員事等情蒙批布

政司會同按察司併查報抄呈到司已經移文
按察司會議去後今准該司牒稱本司看得豫
嘗天地之中幅幘遼闊姦宄易生軍衛星列于
兩河營兵碁布于諸郡盖以捍禦中夏拱護藩
垣一切修飭武備整頓軍容如京邊之官軍督
發先期省鎮之操練提調有法于閩司端有賴
焉河南掌印賈都司龍韜素裕豹畧優閑撫字
三軍慈愛春融岩谷威稜八面號令秋肅風霆
武弁感挾續之恩兵士仰投膠之惠班軍番上
獨早有裨修防戎行駕馭惟嚴風生壁壘洵閩
帥之翹楚而介冑之師表也茲當俸深報陞邊
將官軍拔臥情真柝援先年張都司加銜事例
保留久任裨福行伍振作敵愾似宜俯從咨部
題

請以協衆望者也檄合回復等情備牒到司准此該
本司看得河南掌印賈都司畿南世冑中土干
城氣吐風雲萬里長城遠峙膏藏甲冑一方鎖
鑰稱雄備禦邊塞流芳營操德清勝譽閩專汴

上各衛所介士皈心威肅戎行諸營伍官軍戴
德俸深望重超擢衝邊惟是官兵依賴正殷咸
請加銜久任懇詞保留情出衆願似不可不俯
體輿情者所據援比加銜之例似應准從合候
詳示特爲咨部具

題加銜久任庶闔帥得人而地方有攸賴矣等因
且呈到院據此會同巡按河南監察御史鮑
爲照中原腹心之地營衛基布星羅所藉提衛
統馭緊惟都閫是賴苟非廉足以服衆惠足以

洽人鮮有得其愛戴而不忍舍者都司掌印僉
書賈士奇桓桓壯志矯矯雄威統營衛而提調
有方馭官軍而寬嚴得體且飲冰茹蘖之操尤
爲武弁難及坐是一聞陞任羣情遑遑如嬰兒
之失慈母也官軍共留具見依劉之切藩臬覆
議應循借寇之思在本官雖不擇地而輿情似
應准從擬合咨請爲此合咨
貴部請照咨文事理煩爲裁酌如僉書賈士奇
可以留任希卽具

題施行所陞大同員缺另行推補庶邊方腹裡俱
有攸賴矣仍希咨示施行

一 咨

兵 部

天啓七年三月 初六 日

咨偃師縣熊教官辯復

爲子情不白臣苦欲申泣干

聖慈矜

勅查勘以明心蹟以全末路事據河南布政使司呈
天啓六年十二月十二日蒙本職案驗准

吏部咨考功清吏司案呈奉本部送吏科抄出
原任河南河南府偃師縣儒學署教諭事被劾
舉人熊鈐奏稱臣係湖廣常德府桃源縣人繇
本省壬子科中式舉人于庚申年七月乞

恩就教銓得前職本年九月到任壬戌年十月聞母
憂離任至癸亥年五月接邸報見河南舊撫臣
叅及臣么麼一氈致挂吏議自甘死絕何敢哀
陳幸遇

天恩浩蕩荏苒苦塊餘息伏讀

御詔內一款凡各衙門有橫被讐誣衆口稱寃者許
昭雪叙用臣於是仰

天叫號雪涕淋漓哀鳴於

君父之前以冀覆盆之照臣蒞任甫及兩年曾兩蒙

院薦三次院獎雖道府委署縣事皆僅以月計
登封澠池卷案可考禍緣兩院委審挈訪犯臣
執法過迅除奸過嚴致遭讐憾暗圖報復適承
訃歸誣以匿喪一月上臺止據風聞劾臣不孝
因索及貪穢臣更何辭但不孝大罪也貪穢汗
名也以不孝而蒙汗名
堯舜之朝豈容有此獸類臣年未三十叨登仕籍前
途尚遠忍自負以負我

皇上遽至此乎臣原籍棗源距偃師二千七百里臣

母以壬戌年八月二十八日病故九月初三日
移文河南十月初十日在任聞訃二十一日離
任報喪聞訃僅一月許關文在偃

皇天後土實所鑒臨哀哀父母人孰無之臣獨非人
耳自背戾署印月餘奔走不暇行事能幾冒以
貪名無論臣拙朴無似卽跼蹐神手恐亦束於
時日也伏乞

聖恩矜臣辛苦一第乞養一羶未歷一朝之俸遽蒙
不齒之誣

初部行文查勘得蒙昭雪奇寃剖明穢蹟臣雖粉骨

市朝猶將誦

聖德于無疆也等因奉

聖旨該部知道欽此又該刑部尚書喬 山東道監
察御史楊玉珂等揭爲寒局操履未壞青年博
雅堪憐謹據同郡耳目之真代爲剖白以俟曲
全事揭稱本府偃師縣署教諭事舉人熊鈐壯
志直期九萬博學欲貯三緗秉鐸而本庠執經
向風談藝則隣封召笈慕義祗緣署篆月餘執

法過迅速致忌者中以危言蔽省馮撫臺公祖
據道府所列而劾之非有成心也今事久而該
諭之心事愈明創極而撫臺之憐才轉切除匿
喪一節絕無違礙爲楚中諸縉紳公揭所共表
暴職等爲士人薄祿名節爲

國家愛惜人才似應代控以冀洗雪等因送司呈
堂奉批查酌等因奉此相應行勘案呈到部擬
合就行爲此合咨貴職煩將被劾河南南府僉師
縣署教諭事舉人熊鈐原叅事情并本官奏請

及鄉紳公揭始末緣繇逐一確勘明白具繇回
報以憑覆酌具奏施行等因准此會同巡按河
南監察楊御史案仰本司官吏照依咨案備奉
欽依內事理卽便會同按察司將被劾河南南府僉師
縣署教諭事舉人熊鈐原叅事情并本官奏辯
及鄉紳公揭始末緣繇逐一確勘明白通詳兩
院以憑覆酌咨部施行蒙此又據本司經歷司
呈抄蒙巡按河南監察鮑御史案驗奉
都察院勘劄准

吏部咨前事抄呈到司俱經移文按察司會議
去後今准該司牒據河南府申據偃師縣申據
本縣鄉官吏部郎中張其平湖廣衡州府知府
蘭完植寶慶府同知陳所學江西饒州府通判
王家柱陝西延安府延平縣知縣史永裕舉人
喬國棟董景星史永祺張爾統選貢溫九臯喬
象升歲貢吳守已王元功史永祺結爲寒氈初
無敗檢之蹟青年堪有可憐之才謹就通邑耳
目之真代爲剖辯以昭公道以伸前寃事原任

偃師縣署教諭事舉人熊鈐博學鴻才志唯博
夫九萬端修介節心恒盟乎四知秉鐸而立雪
坐風士爭負笈署篆則懸魚馴雉民稱循良事
久論真迄今尚懸去思之味訃聞憂去何故橫
加無情之誹祇緣其鋤治通家未免嚴迅若輩
廣布流言適乘丁艱因造匿喪之說以五日之
京兆遂投杼於三至致撫臺馮公祖風聞論劾
唯是本官原籍楚之沅源距偃師二千七百餘
里其母以壬戌八月二十八日病故九月初三

日移文十月初十日聞訃二十一日解任報艱
奔艱其事固彰彰在人覩記也可以屈指而一
聞凶音號泣幾絕遑遑過往爾時闔邑人士聞
者傷心見者酸鼻方共哀其迫遽無聊相與挽
留之無從而隱匿之事幻耶夢耶殊令人不可
解矣卽三署縣篆皆僅以月計爲日幾何行事
幾何無論本官素以道義自矢絕無此汚狀縱
有能貪之術欲貪之胸恐亦束於時日無所措
其手大率萋菲之來中人甚毒而欲加之罪何

患無辭忌者誣以危言上司非有成意况狀亦
無他卽撫臺亦致惜於書中而事有可憐生等
忍緘嘿其輿議狀與垂鑒地方之公結轉達院
部而俯聽念少年賢科未受一日之實職雄文
雋士遽遭百年之錮沉特發慈悲立賜昭雪將見
國家愛惜人才之雅化如日中天而

廟廊秉彝好德之盛心於今更烈矣等情又據本縣
儒學廩增附生員周萬民張光奎劉德純等連
名結爲庠師居官之節未虧匿喪之情原訛忌

者中以危言上臺初無成意謹據通學輿論之
實併覈當日報訃之期代爲剖鳴以彰公道以
奠矜全事又據鄉約劉孟禎等里長王世胄等
老人周世選等耆民姬祉等連名結爲保結丁
憂署縣教官事各稱保勘得本官並無匿喪貪
污情繇其結到縣逐一查明具結申府覆查相
同并將原來冊結呈送到司該按察司署印陳
叅政看得偃師縣署教諭舉人熊鈴筮仕寒羶
尋歸守制代篆歷時有幾去後倏起煩言讐口

之風波難憑本官之奏辯甚悉結勘有據心跡
已昭等因備牒到司該本司看得原任偃師縣
署教諭熊鈴青齡始授一羶蒞任方及二載代
篆日淺聞訃卽歸去後中以讐言遂致風聞議
處業經本官奏辯及在京鄉紳公揭又據該縣
取有鄉官士民約耆里老保勘甘結辯理懇至
該府覆查相同似應俯從輿論昭雪以全士人
名節者也等因具呈到職據此會同巡按河南
監察御史鮑 看得原任偃師縣署教諭舉人

熊鈴秉鐸二載署篆三邑後以母喪旋里未幾
論劾褫職今遵

恩詔叩閭自剖邑之鄉紳亦以博雅堪憐爲之公揭
蓋念其半世青燈纔得廁名于鶚薦而兩年絳
帳或不喪志于蠅頭乎原日之彈業經
部覆本官之控因于

恩綸

廟堂應有定議也相應咨復爲此合咨
貴部煩爲酌復施行

一

咨

吏

部

天啓七年三月

二十八

日

欽詔王壽爵季之駿趙舒日王瑞麟田用坤滑
文尉李承宗范奇才胡順罔炤金闕颺等貢生
湯三俊雷從龍郭猶興等監生張問奇于鶴齡
郭圖興等呈稱竊宇內適多事之秋睢陳正緊
要之地礦盜時發於西南蓮寇潛伏於東北地
界三省窩竊在在思逞民苦加征餓殍皇皇莫
保所賴以彈壓而控制之者惟良憲司是賴近
幸睢陳道張廉使自駐節以克副察吏安民之
職由畫制馭撫綏之道品格周出商彝於農出

自天賦節操冰清玉潔淡泊絲於性生革行戶
減日用儉以助廉而萬姓懽騰弭盜賊簡詞訟
廉能生威而奸宄屏息飭武備則軍伍生色修
學較則士氣奮揚矧劄水田於鄴北井田興萬
世之利平礦盜於汝南經濟消百年之逋不動
聲色而巨酋歸順謀惟攻心不煩勦捕而脅從
盡洗動堪勒石允矣韓范之猷卓哉龔黃之績
他如節省歲溢二萬明察冒除五千強宗革面
奸黨密擒種種偉烈處處實政適因資望陪推

誠恐陞擢難輓士紳切切效潁川之借寇君黎
庶皇皇真嬰兒之戀慈母幸逢老公祖撫綏中
夏察吏安民鶴鳴等偕輿情匍匐上陳以公論
徬徨共懇仰祈上體

朝廷倚任之意爲地擇人俯從草野卧轍之心代民請
命特疏奏留加銜久任則風憲之善政克終而中土
之奠安未固矣等情又據陳穎歸睢等屬十七
學廩增附生員吳二陽季鑛宋一琳等呈爲超
異監司懇恩轉請保留加銜久任以安地方以

慰人心事竊念陳州淮陰故郡以衝繁之地軍
民錯處控制繇來獨難當多事之秋狐鼠潛萌
彈壓更自生茲惟見任睢陳兵巡道張廉使一
方坐鎮三郡牧寧恬靜性成允矣商彝周鼎肅
清天賦洵哉露鶴霜筠日用而淡素異常舖行
則分毫不染今嚴竊篋禁首呼盧每虞烽燧驚
原野將必就閑卒皆歸伍可使風雲幻陣圖貞
百度表百僚北斗泰山俾葛嶺首巔並重勅五
刑弼五教清風明月與柳湖錦沼俱澄發粟賑

貧生襁被免絕糧之厄捐金修文廟宮墻瞻賀
燕之輝德威化格蓮餘媿今公之偉績謀畧蕩
平河寇邁方叔之壯猷春溫到處民懷秋烈聞
風吏畏矧前歷任夙著奇勲盧靈告變倉皇本
道提兵征勦殲其魁首宥其脅從莫不輸心落
膽諭賊擒賊用礦平礦共飲妙筭神機義服惡
宗數年反側咸爲革面力除極黨一方頑梗悉
作良民大破獬賊于山中黔黎得而安枕活捉
東妖于境內疆宇從此奠益解節省二萬金以
佐軍需濟時艱於待哺查冒祿五千兩用抵遼
派甦民困於倒懸獻國璽蒙寵賚隆施墾屯田
則刻章特叙乃文乃武豈繁異人爲韓爲范再
逢今日宜歡呼徹於兩河而感戴遍於中土者
也惟是屢奉紀錄優擢之

旨未霑邁倫超等之恩邇者資望旣深陪惟已久誠
恐召頗收於禁中一旦失夷吾於江左倘俟陞
遷報到臨期控籲何從幸際太宗師仰體長城
之倚特疏奏

聞暫緩一封渙汗爲民題

請破格加銜留陳久任地方幸甚又據陳州守備指
揮千百戶許杆胡守祚等呈爲乞恩保留仁憲
加銜久任以安地方事陳州衛把總馬思愛朱
世恩陳州四十五里里老鄉民宋桂等鄉約街
民王大儒等段行邵順成等典當舖戶鄭三義
等各呈稟爲懇留仁憲整軍安民等事等情俱
粘連蒙批仰布政司會同按察司查議報蒙批
又蒙本院批據睢州舉人王際昌等原摺附等

生楊永煥等呈爲懇留異才實政監司以竟宏
施以惠地方事竊照兵食計足而國家元氣方
張久任功成而運會風猷始變保障常屬長子
鎖鑰未賴丈人有睢陳道張按察使慈祥天賦
經濟心成前治鄴郡以節省萬餘充遼餉萬戶
沾解推之恩近在河汝以勦撫一策定叛民一
路絕干戈之驚何幸睢陳慶得來莫行法自貴
振嚴威于豪強敷政先絜沛雨露于黎庶懲刁
風而奸訟越訟唆訟三端絕矣清案牘而寃獄

疑獄久獄一時雪焉蠲賑穀而寒生腹潤明國
法而篤宗心回整飭邊戍兩防之軍偕偕趨事
嚴核城操久疲之衆肅肅在營允在屬吏悉仰
憲體而肖至治惟茲民猶瞻福曜快旻幪且睢
陳一隅地當極衝輪蹄絡繹誰憐凋殘之色在
苻潛氛幾多竊發之虞所賴振刷貔貅撐天中
東南半壁彈壓狐鼠護梁苑內外全封功力非
小所願實深近讀邸報陪推右轄誠恐秩陞咸
失恬冒懇恩俯憐衆念仰干

宸聽但加新銜仍蒞舊任將足食足兵延袤編氓慶
安堵察吏字民方面濡沫洽肌膚共矢留公之
枕期遂借寇之望等情又據睢州鄉民孟一慶
等稟爲保留廉明仁愛監司加銜久任以慰人
心以安地方事粘連蒙批仰布政司會同按察
司并查議報蒙此又據本司經歷司杪蒙巡按
河南監察鮑御史批據睢陳闔屬鄉官張鶴鳴
等呈前事蒙批布政司查報又蒙本院批據陳
州守備指揮千百戶許杆等把總馬思愛等呈

稟前事蒙批布政司查報又蒙本院批據陳穎
歸睢等十七屬生員吳二陽等陳州鄉約街民
王大儒等里老鄉民宋桂等段行邵順成等典
當舖戶鄭三義等各呈稟同前事粘連蒙批布
政司會同按察司並查報又蒙本院批據睢州
舉人王際昌等廩增附生員楊承煥等鄉民孟
一慶等呈稟前事蒙批布政司會同按察司查
報又蒙本院批據太康縣儒學廩增附生員姬
履貞張明世趙珙璧等鄉民彭商士等呈稟爲

保留賢慈兵憲懇恩題請加銜以究洪施以培
治脉事粘連蒙批布政司會同按察司查報又
蒙本院批據睢陽衛軍政掌印指揮田發榮等
歸德衛掌印指揮賈重慶等各呈爲乞恩保留
藩臬賢能以重方向以慰人望事俱蒙批布政
司會同按察司并查報抄呈到司俱經移文按
察司會議去後今准該司牒呈該本司會看得
睢陳道張按察使迴瀾姱節濟川通才砥躬修
如履如臨厓民瘼繇饑繇溺靈盧彌變深切衣

和之防徐湯震驚預圖桑土之計黔氓依如慈
母紳士戴若神君懿德湛恩已灑潤于頃歲深
仁厚澤宜不憊于化成况睢陳素稱多事之區
而彈壓允藉藩秩之選俯從士民之請用殫宣
旬之猷擬合回復等因備牒到司准此該本司
看得睢陳道張按察使經文緯武長才玉質金
相粹品救時甘澍濟世慈航守鄴城仁沛膏流
鎮滏水風清浪息備兵河汝收戡定之奇勲秉
憲睢陳着彈壓之偉績地方多事正藉鴻猷壯

藩屏于兩河弭荏苒于隣境東南之保障胥賴
士民之愛戴孔殷填綠陪推動輿情扳劉借寇
宜協衆願竟該道峻烈宏施所據加銜久任似
應俯從者也等因具呈到職據此會同巡按河
南監察御史鮑 看得陳宋輿圖寥闊民習驚
悍與淮潁齊魯疆域相錯良楛雜居貞奸莫辨
加以連歲災沴頻仍人心詭脆所恃以肅清而
安戢之者惟兵巡一道是賴竊見該道按察使
張夢鯨器度瑩冰皎月政治甘雨和風功著戢

綏民懷保障士庶業倚爲長城矣近見陪推右
轄惟恐爲他省所奪皇皇如失怙恃接踵遠來
合詞籲留據其情詞迫切真有一日不可離本
官者雖本官治行操守何所不宜職等爲地方
計豈宜拂羣情而不爲之轉達耶相應咨請爲
此合咨

貴部煩爲垂答如本官可留希卽特疏具
題陞以應得職銜照舊管事庶保障如故而軍民
提福矣

一

咨

吏

部

天啓七年四月

十一

日

容補磁營練兵遊擊

爲就近查補將官以重武備事據清軍兵備道
河南布政司右叅政兼按察司僉事陳其猷會
同河北監軍道右叅議兼僉事祁承燝呈稱磁
州遊擊團練三營專備調援關係最重難容久
缺今方遊擊旣已陞轉若候

部推未必卽至今查標下中軍都司僉書王養
民偉貌鵠立七尺韜畧風生八百干城重噐保
障雄才可堪推補前缺合候裁奪容

部題請

命下之日行令本官刻期赴任庶武備重務不至乏人而調援有賴矣等因具呈到院據此案照天啓六年五月初三日准

兵部咨爲回奏事該本部題推用武職緣繇今後在京候補候推者當令月一過部堂司親閱其才品在外聽推者責令各撫按慎揀雄才毋容使猥瑣濫竽致臣部冒昧從事也以俸薦素人才請自今日始矣等因題奉

欽依移咨前來已經欽遵并通行司道等衙門知會外今據前因議照磁州爲中原重鎮各省咽喉東控漕運西鎮太行北護神京南衛

陵寢又兼夷氛未淨設有三營專備調援見今兵馬雲屯壁壘星列而訓練鈴束實惟遊擊是賴苟非歷練之久才幹之優者弗克勝任今該鎮方遊擊業已報陞所遺原缺例宜俟

部推補第武備重務旦夕不可乏人倘蒙推自遠方未必刻期卽至今照標下旗鼓都司王養

民武藝精閑才譎諳練傳宣已孚衆志專任必
振軍威且堂堂偉貌沉沉雄畧雅負干城之望
允堪鎖鑰之司又俸薦俱合若以之陞補前缺
深合

部題之格至本院旗鼓亦不可旦夕缺人查有
聽用守備孔文英標兵營守備賀諤俱技藝超
衆知畧過人文英前以擒賊有功蒙真定撫院
具

題見候

部推擇一而任可稱得人而本院之所不敢過
望者也併希

貴部裁酌施行

一 容

兵 部

天啓七年七月

十六

日

咨議補儀葉二縣正官

爲查補縣正官員以安地方以通選法事據河南布政使司呈蒙本院憲牌會同撫治鄖陽右僉都御史梁

巡按河南監察鮑御史照得儀封葉縣正官懸缺已久縣事廢弛堪虞承乏者自非盤錯之器益深叢脞之憂久候銓除杳無音信適接邸報見文選司公揭謂河南之儀封葉縣地當衝繁均屬鉅邑向係甲科除授今查閱急大二選簿

甲科該授縣令者杳無一人大選內止有舉人一名貢生四名急選內止有舉人一名貢生二名此數人者僅可供小邑之用卽推陞數人皆係舉人降謫首領貢生列名薦剡者量陞小邑而衝繁鉅縣弗能勝其任也是在撫按爲地方起見酌量時之緩急地方繁簡擇人

題調暫通選法之窮庶無缺官廢事之虞等因抄傳到院合行查議爲此牌仰本司官吏卽便會同按察司速查所屬內有事簡小縣俸淺甲科長才暫屈于短馭利刃應試夫盤錯堪補封葉兩縣者呈詳三院以憑會

題施行遺下員缺報部陞除毋得遲緩蒙此又據本司經歷司抄蒙巡按河南監察鮑御史憲牌前事抄呈到司俱經移文按察司會議去後今准該司牒稱該本司將按察使議照所屬縣分內並無任淺甲科堪以調補封葉二縣者第急大二選旣一時乏員而兩縣懸缺又勢難久待今查得開封府捕盜通判孟紹孔恢恢遊刃才

猷凜凜吞冰操履手無難事人有異稱似宜以
新陞知州職銜留管儀封縣事本司簡較顏日
愉品如玉立心切冰兢長才已見一班錯節真
堪萬應堪以陞補葉縣正官其二官遺下員缺
另行銓補擬合回復等因備牒到司該本司會
看得地當衝繁必借盤錯之噐事慮叢脞尤需
幹濟之才封葉兩縣久已懸缺急大二選苦于
乏人矧今時事孔艱詎堪歲月久稽今照開封
府捕盜通判孟紹孔卓識清操長才潔守

茂騰芳譽督緝久著賢聲帶儀數月事治民安
近陞滇南陸涼知州而封汴士民情切攀卧奔
訴泣留亟宜俯順人心照新銜知州管儀封縣
事以孚輿情者也按察司簡較顏日愉偉抱宏
才丰姿粹品司幕久脫囊穎投艱克荷壯猷向
署延津衝疲之地深得士民之心衆務畢舉邑
事改觀若以陞補葉縣知縣必能整頓煩難展
其驥足以上二官才優治劇衆望攸歸且于人
地相宜均能勝其任而愉快也合無請乞詳示

亟爲咨

請照銜陞補庶銜地有得人之慶邑事無廢弛之虞
矣等因呈詳到職據此會同撫治鄖陽右僉都
御史梁

巡按河南監察鮑御史照得儀葉兩縣均屬繁
劇衝疲任斯邑者往往難得其人使非精明果
毅之品必多叢挫隕墜之虞查得開封府通判
孟紹孔識力精凝才猷敏練署篆萬家膏雨司
捕一路清風按察司簡較顏日愉雄才陶乎百

練素節瑩夫四知慕職克脩民社堪寄紹孔署
儀封數月大得民心近聞陞陸涼知州汴儀士
民擁職衙門而攀留者數百人若以新銜留管
儀封縣事大孚輿情雖以府官改任本屬之縣
于本官似覺不便職等爲百姓計亦不暇爲本
官計也顏日愉亦係遷謫舉人陞補葉縣似與
貴部慎重之意有違職再四與兩司商確咸以
葉邑廢弛已極非此官不能振刷職亦見此官
署延津一月而衝疲之邑頃爾改觀知才調非

庸庸者不可以有用之才久淹無用之地也既
經兩司會議具呈前來擬合咨請爲此合咨
貴部再加裁酌倘果不謬煩爲早賜具

題將開封府通判孟紹孔以新陞知州銜管儀封
縣事按察司簡較顏日愉陞補葉縣知縣庶人
與地相宜而吏治民生均有賴矣遺下員缺另
行銓補施行

一 咨

吏 部

天啓七年七月 十三 日

峇巡河南王大叅留任

爲懇恩保留賢能監諫俯以新銜仍任未綏地
方事據河南布政使司呈蒙職批據河南府汝
州等州雒陽等縣鄉官喬允升邢紹德李宜培
等呈稱竊照汝雒控八郡之雄抗嵩門而扼地
險岳牧肅百僚之度持外憲而贊中幾非偉丈
夫不足分藩必真君子始可握紀分巡河南兵
備道王叅政道包經緯政妙弛張心事質鬼神
夜塵清獻之禱官屬絕私餽釜生菜蕪之塵愛

民推以赤心重士加之膝上嚴查核於屬邑而
耗蠹獎清飭訓練于操兵而貌貅氣噬迅霆摧
嶽大猾咋舌以消魂劓刃橫霜窩通聞風而遁
影挽銀河水洗群黎不白之竒冤立玉山岑振
一時獨伸之正氣仰之者真如父母頂之者何
嘗神明誠兩河慈惠之師洵一道澄清之使維
汝方切二天之戴

廟堂忽有三秦之移陝以東億萬家人人倚天垣而
瞻景曜周以南數百里在在傍月戶而望鄉雲

惟是西南一帶山原倏有礦洞幾多亡命偶爾
嘯聚大驚群情幸有范老甲兵旋令么麼解散
但本道原以坐鎮嵩廬之險而盧氏恐或仍有
匿谷之徒非得壯猷何以彈壓郭汾陽六秉旌
旄曠載更逢名世嚴公子三臨巴蜀多年茂著
竒勲况河汝山澗深窈竊發無時而本道威信
素孚聲靈遐暢祭戟多蒞一載地方安枕一年
仍留新銜輿情共注呈乞俯從移容保留庶卓
異可無不竟之畫而士庶亦慰攀留之願矣等

情蒙批仰布政司會同按察司速查議報蒙此
又據本司經歷司呈抄蒙

巡按河南監察鮑御史批據汝雜等州縣鄉官
喬允升等呈前事蒙批布政司會同按察司查
報抄呈到司案照先蒙本院批據汝州寶豐縣
鄉官貢監王之晉等呈爲懇天申請保留恩官
以愜輿情以安地方事汝屬四封古稱遵化年
來災侵民貧地方殊不安静幸遇兵巡道王叅
政加意撫綏作民師保雞犬賴以寧魂鴻焉
此安枕百利方興而民謫慈母諸害甫除而吏
凜神君丕奠嵩嶠金湯坐消雜汝波浪歷任一
載功垂千秋洵所謂留一日則蒙一日之安去
一日則貽一日之感者也茲者恭聞

新命晉秩秦憲凡屬士庶攀轅無從叩

關何計莫不相對涕泣如離懷抱之赤子不勝眷戀
於父母也懇乞鼎力迴天俯從民便增以新銜
仍以舊土庶疲黎復沐再造之恩而地方亦永
獲安寧之福矣等情又據汝州寶豐縣儒學廩

增附生員劉湛源蕭世沴李珩等呈同前事邾
寶二縣鄉民陳射喬大受等告爲保留廉賢以
安萬姓事汝弘等三衛軍餘姚時傑等告爲叩
天留鎮事等情俱粘連蒙批布政司會同按察
司查報又蒙本院批據河南府汝州雒陽魯山
等學生員王宅勝劉湛然李一桂等呈爲地方
萑苻倏聞兵憲彈壓最亟懇乞

題留陞遷監司照新銜久任以消亂萌以綏重鎮
事河南府雒陽陝州一平四處鄉約鄉民苗時
傑等汝州魯邾寶伊鄉約鄉民李成章等保爲
急留監司久任以濟時艱以安民心事粘連蒙
批布政司會同按察司併查報抄呈到司俱經
移文按察司會議去後今准該司牒稱該本司
蔣按察使會看得

國家當民窮財盡之時所爲撫綏安全之者惟監
司是賴况汝南西鄰關陝南接葉召礦盜頑民
緝寧不易兼以比歲水旱爲灾斯民艱食監司
尤亟亟焉今分巡河南道王叅政渾金璞王之

品追風掣電之才與學而化行俗美振旅而士
飽馬騰民歌化日春臺威肅城狐社鼠允矣南
國金湯北門鎖鑰也士民合辭而請遮道而留
非其深仁厚澤有以固結人心而能使之不
自來奔趨恐後乎矧送往迎來地方未免騷
擾而新銜久任汝民實慰雲霓之望所當申
請以順民情耳等因備牒到司該本司會看得
河汝爲川陝要衝盧靈當災變甫定山盜殲寇
竊發靡常整飭彈壓調停匪易勤組練以安反
側撫予遺而濟時艱于該道有攸賴焉分巡河
南道王右叅政北斗太山品望行雲流水才華
操潔三川政高二室崇文教化普菁莪詰戎行
風清壁壘恩威並濟春濃郊鄙之墟仁惠旁流
露湛崑亟之谷保障倚藉正殷士民愛戴方切
時值報陞于秦中人爭借寇于汝上相率奔趨
懇訴保留足徵該道之恩洽人心也如此亟宜
俯順群情照依新銜久任該道以竟厥施庶與
論允孚而上下相安矣等因具呈到職該職會

同

巡按河南監察御史鮑

議照河汝一帶盡

屬山峪礦寇出入無常奸宄潛伏莫測邇來小民艱食人心思亂廬靈之變業已見於前事矣卽今餘燼未息防範正嚴所賴彈壓撫綏緊惟該道是賴分巡河南道右叅政王應楫經文緯武之才金相玉質之品惠流一天甘雨威行千里秋霜城社塵清鄙屋日麗一方黎庶正切倚賴倏聞報轉秦中萬姓如失怙恃故鄉紳士民靡不攀轅臥轍擁門保留其勢誠亟而其情洵可念也况新任副使王良臣尚在廣西途路遙遠到任無期衝疲之地久亂之區詎可旦夕乏人耶旣經兩司會議呈詳前來擬合峇請爲此

合峇

貴部煩爲俯順輿情將本官照依新銜留管該道事務所遺陝西河東道員缺并新任副使王良臣查有人地相宜另行具

題調補庶人心允孚而地方有裨矣

一 吏部 咨

天啓七年七月

二十三日

日

咨請折四年臨德倉糧

為糧官苦累入骨臨德催促驚心懇乞調停急
解倒懸事據河南布政使司呈據開封府申蒙
本司紙牌蒙本院批據督理糧儲道呈據開封
府申蒙本道劄付蒙本院批據鄭州等州州同
何守義祥符等縣主簿胡士性呈稱義等職專
糴買漕運捐軀更復何辭但物力久厄於天時
官帑又苦於匱乏有勢難兩辨立見喪亡者何
得不呼天臺而瀝血也切照各州縣正兌改兌

之外復有臨清德州之儲在昔歲穩時豐糧官
何難於并糴價平鏹足印官亦易于責成不謂
頻年災旱市價倍高臨德買米之官有如斃命
狸犴其子生員繼亡妻女見行乞於原任者許
州周判官是也又有如賠糧不足三載幽囚倉
禁者開封之錢照磨中牟之周縣丞鄆陵之董
主簿陳留之黃縣丞四人是也又有鄆州初任
之魯州同襄城之何縣丞封丘夏邑虞城之三
典史睢州已薦之王州判六人相繼逃去此等
疏之乞留其始末源委尤不敢不備陳於

明旨是臣所竭蹶奉行之心也然而部咨之原議臣
皇上之前蓋中州通省奉戶部題

准改正四項之銀實止十一萬三千六百有奇而天
啓五年五月間戶部咨將前銀扣解四萬兩以
充遼餉其餘七萬三千六百餘兩仍聽中州練
兵設防之用是戶部之所望於中州者似宜信
前咨而止在此四萬之數不在此七萬之銀也
及該部題覆毛帥之疏始欲盡撤中州之兵而

臣以中州去兵則安危治亂所關非淺故不得不具疏籲懇然所欲仍存者亦止在此七萬之銀而并及其原咨之四萬者蓋因正當秣馬繕兵以候徵調之時其一應安家行糧衣裝器械無可措手故并欲留此以應目前之急者亦以發兵之錢糧總爲戶部之正務此暫而非久者也中州之兵不調臣自當以暫留者解補以足原咨四萬之數此於該部無分毫之虧而於中州有應卒之備是臣區區臨事之苦心也至於乏筭卽死何益於

國計哉職等交覓之後惟有去而已伏自本院下車註福天中兩河萬彙咸得澤後蘇恐立視六群無辜之官身亡家破流落他鄉而不解一面之湯網耶爲此窮極呼天各官共萬口生命生不能啣環世世効結草也等情蒙批仰督糧道查議報依蒙行據開封府申准本府管糧廳牒稱准此已經移牒歸德彰德懷慶河南五府會議去後隨准歸德府閔稱本年四月二十一日

先蒙本道批據本府委買所屬糧官商丘縣主簿馮嘉言等呈同前事蒙批仰歸德府酌議速報蒙此該本府湯知府看得任土作貢以其地利所有輸輓之便原非強民以不堪今本府應運臨德倉糧遠者七八百里近亦五六百里相載而去脚價倍於米價勢不得不就近收買往年僉報民間大戶每一供役身家立傾故酌議官買官運歲比豐稔額價充裕固可支持連年災傷接踵米價騰貴數倍於前當事者慮慮民

隱諱言加派卽間有增加尚虧半額委官賠累掛冠不顧有慷慨願往者雖黽勉竣事必至身家罄竭形神委頓報命之日捨天呼地情形慘慟不能仰視如未城典史梁祥之訴真堪痛哭竊念一命寒微原求升斗自潤及至喪身亡家民固不可不憐官又豈堪爲宰今欲以官運者移之於民爲民父母固不忍言職晝夜思維兩全無計不得不僭擬改折一議每年照每石八錢之數酌爲中制貴則增之賤亦不減常令額

數寬然有餘總解本倉召商上納就中權衡其
便有四蓋本府雖有運糧之名原買之近倉諸
處州縣各差一官聚而買之雖豐年亦有徵貴
之勢既解折色本倉可以因時制宜賤則收之
貴則暫存之與時消息充然不窮其便一也各
官兌米官攢歇脚蓆板晒耗種種支節官買官
收陋規漸革其便二也州縣大小不等全設者
少縣差一官幾於空國職務廢弛緩急難應折
色止用一官其便三也往年民累歸官官不堪

命勢必仍歸之民今永遠解銀不爲官累卽不
致終爲民累其便四也說者必曰召商騷擾悉
有冒破且萬一近倉米少將何處收買不思利
之所在人必趨之第稍寬其值較市價少羨則
富商大賈無脛而馳矣况卽今日官運何嘗不
取足於收買未見彼處有缺乏之虞豈召商而
至有缺乏之乎至于冒破之弊則有治人無治法
主計者精明契剔固不必豫爲杞人之慮也目
今已處極重之勢群吏實抱不平之冤起而更

張政在此日如徒目擊弊端終付浩歎又何益乎如謂

祖制不可擅更請將天啓四五兩年暫從未議照每石八錢之數解赴本倉貯庫今歲麥秋豐穩懸知有年姑俟成熟收買足額非惟於諸官寒苦得恤卽主計者未必無小補也等因具申照詳蒙批據詳臨德二倉糧米暫改折四五兩年亦灼見地方之難委官之苦也但部司需糧甚急此時請詳已遲尤難輕議該府再一酌議之

也繳蒙此遵依回復等因又准衛輝府閔稱查本府所屬汲獲二縣每年額派德州倉粟米五百七十四石四斗五升二合昔年徵銀買納糧役不勝賠累邇來責令買運漕糧各官帶買原以小灘易德州難也詎意米價湧貴卽小灘亦稱苦難德州更爲苦難是以各官不得已而具呈上控也惟有比照山東改解折色最便倘以州縣糧役徵解本色是不累官而仍累民矣等情又准懷慶府閔稱臨德倉米輸納原係小民

惟正之供乃僉官買解而價值不常致官賠苦而遠索於其民民以隔面痛痒不關往往解官視爲苦海印官相視錯愕欲議民自運納而且有鳥驚魚駭之象似莫如改折之便也况改折之令已行於齊魯而中州去臨德尤遠豈近者折價而遠者返輸本色乎勞遺懸矣又况一改折而無飛輓之苦可無疊年拖欠之局耶故徵本色於民而民必疲責買解於官而官必病惟改折矣而豐凶皆可以徵收上下盡忘乎齟齬

似莫如改折之便也等情又准河南府關稱得臨德二倉糧米每石派銀八錢買米各官因節年米價騰貴賠累不前因此拖欠未買今各官乞要比照山東事例將臨德二倉糧米改徵折色恐倉廩一空又屬不便欲以各州縣糧役徵解本色反爲滋擾俱難准行合無俯將天啓四年并以前但有拖欠臨德二倉糧米俱照原派數目暫行解銀以完節年不結之局其天啓五年并以後糧米仍令各州縣糧官勒限買米

交納庶公私兩便似爲可行等因各關到廳准此看得臨德之糧米關係

國儲今各府所議不一各有所見無非爲

國但俱改折則二倉將何恃以無恐而糧役徵解又屬滋擾其河南府所議天啓四年以前凡有拖欠者暫行解銀而五年者糧官買納庶局可結而官亦稍稍可任矣等因到府該本府瞿知府覆議看得臨德二倉買米之役歸德府之議誠爲有見本府無容覆贅矣但委官買運固爲

急在得米而遠涉漸買亦必需以時日倘改折色卽以此銀就彼處收買最爲近便何必以買解累委官耶惟是請詳已遲勢有所不及槩求改折則不能盡令買解則甚苦從中斟酌如河南府議以四年前者解銀完局於五年後糧米仍令買納此真官民兩便上下相成之確論也旣經該廳議報前來相應准從等因到道該本道看得河南歲額臨德二倉糧米共計六萬四千有奇舊時民運甚苦而遂移之于官如遇年

豈價足各官尚能竣事無奈連歲荒歉米貴價騰糧官懼其賠累觀望稽遲比比如有完及一半陞遷而去者有全未交納掛冠而逃者是前官應運之米而又遺於後官夫見任者尚不能完本年之米豈能代前官之累乎相沿推調而積逋愈多矣卽今設法催比欲盡完其本色者此必不得之數也若議仍歸民運當此災傷叠見之際餉賦交徵之時間閭懸罄何忍復滋其擾且審其地利辨其遠近惟有改折似爲可行第

行第

國儲關係最重恐彼中未易收買又不敢遽議槩爲改折也今據各府會議本道復爲斟酌惟自四年以前暫行改折照數解銀自五年以後仍令買米嚴催交納此寬舊急新誠爲權宜之計也合無請乞本院咨

部懇賜允行庶新糧早完而積逋立清則官民之困得甦二倉之糧務亦有裨矣等因具呈照詳蒙批仰布政司覆議妥報蒙此隨行據開封

府申稱依蒙行准歸德等府覆議與前相同移
關前來該本府張知府覆議看得臨德糧米
國儲急務奉委糧官自當依期完納屢有拖欠祇
緣歷年以來灾祲疊告米貴價騰各官買納賠
費艱苦是以觀望稽遲致有拖欠且各官陞遷
更代買納不常前官不完望之後官後官規避
亦復如前官踵推襲諉積欠益多欲行催完本
色卽日加箠捷亦無益于得失之數也今議四
年以前改折納銀五年以後徵納本色不惟備

局易結倉廩充實官民兩便之策計亦無右於
此者等因具申到司該本司看得臨德二倉糧
米歷年以來灾祲疊告米價貴騰糧官懼其賠
費艱苦如蹈湯火且各官陞遷代換有完及一
半陞任而去者有全未完掛冠而逃者相沿推
諉積欠愈多每欲嚴加追比催完本色徒費疾
呼終無益也今據道府會議天啓四年以前改
折納銀五年以後仍徵本色庶官民兩便新舊
倉糧易以告竣矣等因具呈到院據此案照先

據鄭州等州州同何守義等祥符等縣主簿胡士性等呈前事已經批行督糧道查議前來猶恐未妥復批該司覆議去後今據前因該本院會同巡按河南監察御史鮑議照臨德倉

米乃小民惟正之貢買運交納係糧吏官守之常原非強之以不堪又詎可以言苦耶祇因連歲災侵疊告米價貴騰各官懼其賠費徃徃窺避更代不一而見任者慮當年之米猶難買運安能代前官之逋而併買四五年之米也窮極

控告情亦可傷若一槩求改折色則倉廩空虛緩急何恃欲仍舊通徵本色四年積逋一時併追勢必難完反復思維無如將四年以前改折納銀五年以後仍徵本色庶官民猶可措辦倉廩不至空虛新舊并完亦權宜之便計也既經該司覆議前來似宜准從擬合咨請爲此合咨貴部煩爲查照

裁酌咨示施行

一 咨

戶部

天啓七年十月

初九

日

峇守大梁周蕙憲加銜

爲公保卓異監司乞留久任以慰輿情以垂未
賴事據河南布政使司呈蒙職批據開封府祥
符縣鄉官原任工部右侍郎王惟儉南京兵科
給事中高節見任戶部主事張元佐談國宦南
京刑部郎中田毓華國子監博士陳九成山西
分巡河東道左布政使蘓進井陘道山西右叅
政都任原任山西太原府同知吳登任淮安府
同知宋明德見任常德府推官孟紹祖三原縣

知縣劉昌原任宜君縣知縣白若玉見任揚州
府儒學教授王名世宗正勤美連名呈稱竊惟
中州爲腹心之地兩河當輻輳之衝水旱頻仍
河漕難於飛輓軍民錯處奸宄易於叢生自非
彈壓有人何以綏輯無患今有本省分守大梁
道按察司按察使周鏘琳瑋粹品黻黼英猷介
爾三公清操直符處默隱然一國壯烈不數子
顏耳雨霈乎泉流春盎寒谷泰山屹其壁立玉
韞豈年當其宣力河渠若築防若卹商人入

雨霑之潤迨夫視篆臬署若疏寃若理枉在在
仰日月之明且徹底而清錢糧耗蠹絕實乃強
項而斧豪右攙搶斂形惟此來旬來宣樹畢公
保釐之業更堪之綱之紀騰常滾觀察之聲迄
總憲以分藩益勵精而懋績止心若水不作米
炭於胸中執法如山一任好醜於鏡上望風解
墨吏之綬屬無敗群坐嘯理亂民之繩府有醇
酒刑清政簡喜用趙人而有同心吏習民安恐
奪我公而胥動色彈指歷俸之久轉盼超擢有

期雖寵秩徵黃揆以

帝鑒而攀轅借寇卜在人情懇乞俯順下情酌查往
例俾加銜以久任庶道行而澤究就此盤根錯
節之逾閒益見熟路輕車之相得謹爲兩河請
命匪獨一路顛私等情又據祥符縣舉人張民
表等呈爲保留卓異監司乞恩預題加銜以惠
地方事竊照分守大梁道按察使周鏘雅道匡
時素心映物從實念以杼經綸自妙湛而恢作
用豈唯吐珠霏玉作慧業人文實能植朽嘘枯

號愷悌君子有肝有膽至方至圓自登車攬轡

以來見請劍埋輪之節兩河底績民無魚鱉之
殃八郡蒙麻澤極羽鱗之被於氓庶見肺肝傾
倒之慕於士紳道義劇切之規張公才識誠爲
代者之師寇父恩波實載居民之口谷中採旨
期以禦冬棠下承恩唯思永世茲歷俸已將再
考增秩又當其期預慮徵劉之及懇爲借寇之
圖伏乞爲民爲國成始成終俯賜代題加以應
陞新銜俾令仍守茲土宋弘舉桓譚誼稱不負

歐公引蘓軾道美相成昔屬一人今爲萬口敢
云比跡私所甘心懇唯軫恤輿情轉申

天聽得如下悃實切霑恩表等爲此懇切具呈等情
又據祥符縣暨闔屬儒學廩增附生員表本浩
等呈爲公舉卓異道臣乞恩題

請加銜以永德澤以奠地方事伏惟德政繫恩情自
慙于借寇人材宜地法不妨于代蕭敢因輿論
之公仰借封章之重竊照分守大梁道周按察
使

王國克生

帝心簡在提修粹潔清操佩九畹芳蘭計畫優長慧
識懸三秦朗鏡筮仕南宮典禮分符中土行河
鯨波效順春流浪息桃花龍堰彌堅秋色歌騰
瓠子方懋决排之績晉膺鎖鑰之司案牘風清
積蠹驚魂于城社保甲嚴飭大憝絕跡于萑苻
械撲課青衿菽圃多鳳麟絢彩桑麻遍綠野樂
郊無狐鼠伏藏驛遞肅清免賠累之苦供應節
省悉撫字之恩伸枉理寃覆盆照于燃犀鋤強

扶弱躍冶歸于鍾鑪一毫關節之不通苞苴盡
杜百凡廢墜之悉舉擘畫允宜急公則捐俸薪
搜括恒傾夫肝膽敷政則不練不競枯樞無愛
于髮膚剖竹多時蚤見周邦之燕喜及瓜此日
尚懸虞典之陟明念茲良牧之雄材寔造會城
之景福誠恐一朝陞任萬姓失天懇乞垂念重
地俯順民情准賜題

請加銜仍留鎮汴庶勞臣得被榮褒而中州未沾德
化矣等情又據

周府宗學廩增附生員朱勤醮等呈為保舉賢能
監司乞准加銜久任以慰輿情事竊惟太梁之
有守道實庶司之紀綱中藩之樞輻也必得其
人則國事民生利賴非淺今大梁道周按察使
明如星晰斷若風行析獄則兩造平反而五金
幾錯申明仕職清標式化于羔羊軫恤民岫安
堵咸歌乎鴻鴈虛萬間以覆士門前桃李成蹊
聳一柱以擎天境內山川如砥一塵不染百度
維貞雲霄之福曜具瞻道路之口碑無間升聞

最績已膺庶鎮之榮薦陟華階當晉顯藩之重
是以士民借寇遠邇留姬乞惟就地以加銜長
倚雲而烘日敢懇代

題佇承昆命則兩河幸甚屬籍幸甚等情又據祥
符縣暨闔屬里老高一林等呈爲保留循良守
道乞

題加銜以永德澤以奠地方事竊惟大梁當天
下之中五方衝衢軍民雜處寔稱腹心重地故彈
壓經制撫按而下全賴道臣今照分守大梁道

周按察使壯志急公實心任事提躬勵白水之
操遇事迎青萍之刃前任管河道盟天誓衆凌
舟于雷吼雪噴之濤飛幟于龍堰蟻隄之畔停
軒于蓼灘蘭渚之間心籌指授是以無煩壁馬
而狂瀾就下我梁人其不魚鱉者誰之賜也迨
任守道以來益殫前猷彌弘新政保甲嚴飭市
井絕頭攫之奸緝訪密羅城隅散潛結之黨識
獄情于兩造肺石風清靖寇孽于千郊萑邨霜
凜庠序成絃歌之化田疇履襦袴之歌洵爲國

之藩垣的是民之父母誠恐服官已久指日陞
遷懇乞垂念地當會省不可一日無此良牧俯
順民望題

請加銜照舊管事庶澤不出疆小民得以永受其賜
矣等情又據祥符縣暨闔屬鄉約周加言等呈
前事竊照分守大梁道周鏘北斗福星中州長
翰砥節一塵不染居官百度維新先任河道殫
力盡心討陽侯而畫策是以河伯習坎就下導
禹皇而東之蒙加乃丕績

題陞今職自守大梁以來益展前猷盡洗弊政循
無伏虎座有懸魚市井嚴保甲之防鎖鑰飭盤
詰之禁籬落絕勾攝之役桑麻勤勸課之條清
驛遞免賠累之苦理訟獄無抑枉之寃至于捐
俸助工新

三朝之鼎構開誠迪士暢一代之文風處處凜若神
明人人依爲父母於今歷俸已深誠恐銓資速
擢懇乞垂念會省重地不可無此雄藩俯順民
情代爲題

請再加新銜仍留鎮守庶德澤得以永沐地方賴以
久安矣等情又據宣武衛指揮使孫謀等呈爲
懇

題亟需方面加銜彈壓中原以安黎庶事竊照中
原乃腹心之地盜跖叢生之所非才幹不能彌
盜非賢良不能庇民自分守大梁道周按察使
歷任以來保障中原人心輸服道不拾遺夜不
閉戶軍民稱快百姓樂業今當陞轉之期誠恐
賢能一轉而不復再遇者軍民失望地方不得

清肅矣伏乞軫念地方多事盜患滋生俯將周
廉使

題加右布政使職銜仍管大梁道事務庶軍民有
主地方無虞矣等情又據

上維等王府教授呈奉

本王齋旨爲方面賢能當權衆心愛戴方殷懇乞

代

題加銜以遂借寇事竊惟官不易方乃悉經綸之
用民因庇宇得調寒燠之宜今分守大梁道周

按察使光岳元精扶輿正氣心懸午日立表而
照無斜陰政作春霖應轅則枯皆特起殫拮拮
以贅轄爲

國干城竭胼胝以馴河俾民隩宅愛棠念切仁風
爲共被之天憇樾恩深惠澤無不沾之處論政
真同麟瑞計期將屆鶯遷與其異時鷓運別方
緒繹盡戟牙旗之馭曷若今日鴻舉舊地連綿
嵩峯雒水之春伏乞俯徇公舉特允代

題一言揚天牘令巍巍總憲晉膺方岳之新階將
八郡飲醇膏凡濟濟群生還頌獨絜于洪冶興
望情孚桐葉轉移柄屬烏臺倘蒙俯允宗庶幸
甚社稷幸甚等情俱粘連蒙批仰布政司會同
按察司查報蒙此又據本司經歷司呈抄蒙巡
按河南監察鮑御史批據祥符縣鄉官原任工
部右侍郎王惟儉等舉人張民表等生員袁本
浩等宗生朱勤醮等鄉約周嘉言等里老高一
林等宣武衛指揮使孫謀等各具呈前事粘連
蒙批布政司會同按察司查報又蒙本院批

上維等王府呈同前事蒙批布政司查報抄呈到
司俱經移文按察司會議去後今准該司牒稱
該本司蔣按察使會看得中土爲諸路噤喉省
會繫藩封重地軍民雜處奸宄易生况連歲災
侵頻仍彈壓之任尤宜得人今分守大梁道周
按察使宏才邁衆厚德鎮浮鋤莠護蘭威德蜚
聲于八郡繩貪警墨剛方騰譽于兩河持已淡
若枯禪奉公孔子赴棘士民愛戴已流勿剪之
聲宗庶攀轅更切靡依之慮目今資俸已深瓜

期且及合詞上請實出同情相應俯從輿願留
任加銜旣足慰衆庶借寇之情亦不失漢庭增
秩之典矣等因備牒到司該本司會看得豫省
中天地而縮轂四方大梁控河嶽而宣猷八郡
徐淮之西鞏維之東北聯懷衛南抵舞葉皆本
司分守道保釐旬宣之地也幅幘遼闊宗民雜
處災荒頻至公私匱竭肩斯任者亦綦難矣必
才誠兩合謀猷素裕撫糜與威稜共濟振肅與
懷綏兼施乃克彈壓重地提福元元者也今分

守大梁道周按察使經綸巨手文武壯猷偉望
山斗齊高長才江峽比迅品瑩玉立操潔冰疑
植良善露湛春濃抑豪強風行雷勵久著督河
峻烈茂騰總憲竒勛分藩壯梁宋之金湯保障
實兩河之鎖鑰膏流上澤普天中士民愛戴彌
殷宗庶瞻依正切瓜期將屆喬擢非遙群情攀
卧共興借寇真誠懇訴保留同祈加銜久任似
宜亟從衆願俯賜

題留特加應晉職銜仍管該道事務庶人心順而
上下相安輿論孚而地方有賴矣等因具呈到
職據此會同巡按河南監察御史鮑議照
大梁乃省會之地

藩封在焉流寓雜聚奸宄易生專設監司以彈壓
之蓋萬姓恃爲保障諸

藩倚爲長城若非才識優長威望素著者難以有
負斯任今分守大梁道按察使兼叅議周鏘經
緯兼資乎文武德威久著于吏民撫摩不憚焦
勞剔蠶弗辭勞怨蒞任自久善政難以縷陳資

俸已深推陞或亦不遠鄉紳士民恐其他移預
爲保留之舉擁門而號呼者踵相接也蓋實出
輿情之公而非尋常之故套矣職等爲地方計
安敢憚其繁瑣拂士民之情而不以上聞乎旣
經兩司具呈前來擬合咨請爲此合咨
貴部裁酌施行倘職等言果非謬煩爲題

請加以應陞職銜照舊管事庶人情允孚地方亦有
賴矣

一

咨

吏

部

天啓七年十月

二十二

日

峇保嵩縣張守備復職

爲請留賢能武官以防礦盜以安地方事據河南布政使司呈蒙本院批據守巡河南道呈據河南府申稱切照本府屬嵩廬等處產有礦洞多爲礦徒嘯聚之藪所賴彈壓者全仗聲望素著之武弁以鎮攝其間有形則躍武解散無形則斂威默消誠地方之利百姓之福也今守備張桂具幹辦之能饒析衝之略其爲礦徒所憚畏也久矣近報陞貴陽百姓聞之如失所依切

照嵩廬等縣產有礦。嘯聚不之。礦角偵伺而欲逞者。實煩有徒。一旦徹此保障。恐新來者不知何日而已去者。不可復追。多事之後。當此空虛。有不忍言。不敢言者。職承乏地方。不得不預爲惴惴也。况當入

覲之年。尤當倍爲謹慎者乎。伏乞垂念地方。具呈保留。俾本官獲以從容坐鎮。則萑苻不驚。綠林潛踪。而府屬一十四處。無震恐之虞。皆自此基之矣。等因。具申到道。據此。看得嵩廬等縣係產礦

之處。素爲礦徒聚散之藪。舊設守備一員。以爲彈壓鎮攝之計。去歲廬靈大變之後。孽萌尚未盡消。蒙上臺憲檄所委者。見任守備張桂統領嵩廬二縣毛兵往來巡緝。故此礦徒憚畏而地方寧謐者久矣。今聞本官報陞貴陽。離任在邇。但正官入

覲地方。旣已空虛。而又失一巡緝之守備。一旦礦徒竊發。舊者已去。新者未至。地方之事。深可寒心。合無俯將本官勉留在任。巡防礦盜。以消姦萌。

以保無虞等情具呈照詳蒙批仰布政司速查報蒙此又據本司經歷司呈抄蒙巡按河南監察鮑御史批據兩道呈前事蒙批布政司會同按察司查議報抄呈到司該兩司會看得嵩廬在河雒之南山川環抱陟澗層巒礦徒嘯聚淵藪姦宄竊發靡常是以專設守備統領毛兵鎮防彈壓最屬喫緊之處曩自盧靈變後反側尚多尤當倍加嚴肅詎可時刻缺武弁者守備張桂與聞韜略技擅折衝素爲礦盜所憚地方賴以寧謐近值報陞貴陽新者未能猝至矧今各屬正官相率入

計彈壓旣已乏人而又去此鎮守何以消弭亂萌保固疆域者哉合無卽如道府所議將本官勉留在任鎮懾巡緝庶礦洞安靜姦宄潛踪其有裨益于地方非淺鮮矣等因具呈到院據此會同巡按河南監察御史鮑 議照嵩廬等縣居萬山之中爲礦徒嘯集之藪所藉彈壓防禦緊惟守備是賴况經灾祲疊見之後又值正官入

覲之時地方空虛奸宄易生尤不可一日缺此官者
守備張桂自蒞任以來馭衆嚴明巡緝謹恪以
故盜賊屏跡閭閻寧謐一方正倚爲長城忽爾
有貴陽之推無論新官未必卽至卽至未必如
本官威望素著深得人心者所以士民皇皇有
借寇之請而道府亟亟據以申聞總之爲一方
安危計非爲本官得失計也旣經兩司覆議前
來擬合咨請爲此合咨

貴部煩爲軫念地方倚藉甚殷將守備張桂照
舊留任庶防禦得人萑苻無警有裨心腹重地
非淺鮮矣

一 咨

兵 部

天啓七年十一月 初二 日

峇議調蘭新二縣正官

爲重地需人甚急謹舉屬邑請乞就近調補以
借彈壓以安地方事據河南布政使司呈蒙職
批據守巡大梁道呈據開封府申竊照開封屬
邑最衝最劇無如祥符人則五方雜處中間之
控制甚難俗則奢侈紛華狂瀾之障挽不易自
非雄才雅度之長剛柔互用善處於上下之間
雷雨疊施斟酌於寬嚴之際勝其任而媿缺蓋
難之也今祥符縣季知縣已陞江北司官所有

錢糧庫獄調停料理時刻不可無人若待大選
銓補南北之人不定未必與地方相習緩急之
性不調未必與人情盡便看得蘭陽縣知縣董
直愚溫良樂易襟期瑜瑾珪璋氣度張龐吳龔
召杜劉黃爲政不尚煩苛真是萬民之父母力
行獨崇恬淡可稱一世之循良不怒而威城社
之鼠狐胆落不招而集中澤之鴻鴈心歸伏望
憐念首邑早宜取此應變之才推注賢良萬不
可失宜人之吏請咨達

部速渡屬員合無將蘭陽知縣董直愚就近調
補祥符知縣在本官朝奉

命而夕可受事在地方失神君而旋得神君不惟祇
候逢迎省夫馬無窮之繁費而輕車熟路實上
下兩利之宏摹然須旦暮酌行方可及時濟事
不然來一少不諳習之官民情土俗未必周知
或倚才智而冥冥決事或尚刻薄而意氣凌人
上與下容有不便之處等情具申到道該兩道
看得祥符縣省會巖邑事務繁鉅軍民宗儀雜

處撫緝惟難自非透露老成精神百倍者未能
勝其任而愉快也今季知縣已經銓轉繁要之
地不可一日缺官若俟銓除恐人地未必相宜
歷查往牒俱簡才品冠絕人望攸歸者就近調
補查得蘭陽縣知縣董直愚峻節華峯耀日長
才巨浪乘風調補祥符駕輕車而就熟踏綦隆
立奏且朝受

命而夕視事可無缺人廢事之虞其有補於吏治民
生非淺鮮矣等因具呈照詳蒙批仰布政司覆
查議報蒙此又據本司經歷司呈抄蒙巡按河
南監察鮑御史批據兩道呈前事蒙批布政司
議報抄呈到司該本司看得汴省爲兩河都會
祥符乃百城首邑水陸交衝軍民雜處人情奢
華最稱庶務繁劇綦難矧係

藩封重地實爲天下腹心宰斯土者必得有宏任
鉅之長才練達明敏之卓識五官互用萬應咸
宜恩威寬猛兼資雨露風雷竝濟迺克彈壓撫
摩而上下稱便者也季知縣已陞銓部一切倉

庫獄訟雜還繁難整頓調停誠不可一日乏人者若俟部中銓補未必人地相宜詎能時刻卽至而省邑衝劇綜理孔艱查得蘭陽縣知縣董直愚青齡粹品偉度通才施政本乎寬嚴士民愛戴提躬渾然恬靜操履端方威以懾奸仁以植善德化乂孚部屋陽春徧敷窮簷卓異循良豈第君子筮仕茂騰芳譽拔艱益展鴻猷今祥邑急在需人正宜就近調補民俗習諳輿論允協合候詳示亟賜會咨將本官速爲調補庶首

邑有得人之慶而地方免迎送之勞那緩就急無煩再計矣等因又據該司呈蒙本院批據守巡大梁道呈爲查議就近調補縣正官員以安地方事呈稱照得開封府屬蘭陽縣省東巖邑也逼處黃河修築工程埽料最爲浩繁且盜賊訟獄尤爲繁盛幸董知縣綢繆料理俱有次第若非率繇得人恐錢糧詞訟不得肯綮其貽害有不可勝言者今該縣知縣董直愚議調祥符而蘭係喫緊之地不可一日無人查衛輝府新

鄉縣知縣李長年嚴明弊絕風清擘畫民安吏習就近調補蘭陽縣知縣庶人地相宜其有裨于吏治民生匪淺鮮矣等情具呈照詳蒙批仰布政司覆查報蒙此又據本司經歷司呈抄蒙巡按河南監察鮑御史批據守巡大梁道呈前事蒙批布政司覆議報抄呈到司該本司看得蘭陽縣設在省城東北兩岸俱臨黃河灘場衝沒歲以爲常修築堤防時不可緩地瘠盜繁民貧賦重非得庶能効幹正官彈壓料理曷克勝

其任而愉快也董知縣展布宏猷衆務畢舉士民方切愛戴今議調繁祥符而蘭陽臨河巖邑需人尤屬最亟查得衛輝府新鄉縣知縣李長年才誠兩合恩威竝濟人地旣已相宜輕熟極爲順便合無俯從該道所議就近調補蘭陽縣知縣在河邑有得人之慶而地方獲相安之益其于吏治民生均有賴矣等因呈詳到職據此案照先據該道呈前事已經批行該司覆議去後今據前因會同巡按河南監察御史鮑議

照祥符爲省會首邑五方雜處宗儀錯居其臨蒞控御急之則拂緩之則玩泯競絀而調化瑟非寬嚴得體才誠兩合之令未易克稱厥任而上下咸宜也今季令已轉江北司官此缺若俟銓除恐人地未必相宜且一時未能猝至政務叢挫深爲可慮查得蘭陽縣知縣董直愚粹品金和玉潤長才電掣雲流力裕盤根才優劇邑以之調補祥符可奏駕輕就熟之績且有朝發夕至之便至蘭陽逼近黃河土瘠民貧夙稱多盜亦稱重地賴董令撫摩緝弭幸有寧宇今旣調繁此缺亦不可久虛查得衛輝府新鄉縣知縣李長年牧愛有聲拊循得體議將此官調補蘭陽庶兩邑俱無曠事之虞而地方咸有撫字之依其有裨于吏治民生匪淺鮮矣旣經該司覆議前來擬合咨請爲此合咨
貴部煩爲再加酌議採擇施行

一

咨

吏

部

天啓七年十一月

初三

日

峇張大叅開前任俸

爲摘叅逋欠以懲怠玩以裕邊餉事據河南布政司分守大梁道右叅政張魯唯呈稱竊照職原任浙江按察司副使分守寧紹台道于天啓四年四月內到任至五年九月初七日因齎捧萬壽表進京離任後事竣暫回原籍于六年二月內陞授今職隨于本年五月二十五日到新任訖並未會再往浙江至本年閏六月內接邸報見戶部題前事除四年分太倉錢糧司道府官照

例指名叅處外內將五年分錢糧原限于年分
未完一併叅處將未完八分以上司道府官查
職名上

請則職在全未完之列矣奉

旨住俸嚴催實邀寬政何敢有辯但思職到浙江任
後奉有

勅諭催盤京邊錢糧其中明開云二年分錢糧三年
分盤完四年依限到部以後做此而職竭厥奉
公務欲先期催趨查浙中開徵在秋成之日故

職于四年秋冬催完本年春夏二季五年春夏
催完四年秋冬二季皆十分全完造冊報司類
報

兩院至五年春夏二季應于本年秋冬催完而
職已于九月初離任勢不能復與聞地方之事
矣離任十一箇月之後又蒙摘叅當此錢糧緊
急之時誠應受過但職係河南司官雖奉嚴催
之

旨而無絲効力且錢糧完欠數在浙江兩地寫遠卽

使今日完已及額亦無絲而知卽知亦無據以
上

聞也爲此具呈本院乞賜移文

浙江兩院或據離任日期與之開豁或查完過
數目得以

題復明白知會使職可以安心受事恐轉盼十月
又是續叅之期待罪之身進退維谷不得不披
瀝以請也等因具呈到院會同

巡按河南監察御史楊

爲照京邊錢糧需

用至急各道奉有催盤之

勅在任解不如期者計數住俸更有何詞惟是浙中
錢糧五年春夏二季應于本年秋冬催完張叅
政于九月初旬業已齎捧北

上矣其拖欠之故恐不盡在本官也蒙叅住俸不無
可矜但事在隔省此中難以完結或據離任之
日准與開豁或查完足之數准與

題復惟于

貴院是望旣經具呈前來擬合移會爲此合

咨

手本前去

貴院煩為查照酌量仍希回咨示施行

一咨 浙江撫院

一手本 浙江按院

天啓六年七月

初十

日

谷提追姚光裕家屬

為抄殺事據河南布政司呈據歸德府申蒙本
司批據犯官姚光裕係南京應天府人原任河
南歸德府商丘縣主簿呈前事內稱血親阮相
等賤裕隻身三差密詒券攬鉛價銀三千九百
兩延蠹刁抗陷身因此阱累抄家無補

國課泣思梟敢鯨吞漏網關係軍儲大辟情急控
天俯准批府關勦完課庶三尺得伸九族甦命
等情蒙批仰歸德府查報蒙此案照先蒙本司

紙牌爲嚴催積逋以急軍興事蒙本院案驗准
工部咨該本部題奉

欽差刑部主事張 守催前事等因蒙此遵行間又
蒙本司紙牌爲議處戎器等事案照天啓三年
二月十三日據歸德府商丘縣主簿姚光裕領
到料銀二千九百兩四錢五分買解天啓二年
分南鉛十萬一千五百零五斤去後迄今四載
已經屢催二十餘次未據完報本官何物么麼
敢於坐視致蒙

部院差官守催急如星火其中想有侵費等弊
擬合差人查提爲此牌仰本府官吏卽查商丘
縣主簿姚光裕原領鉛價在於何處收買見今
堆放某處因何四年不行起程請文赴部有無
侵費情弊該府委官一一查驗足數卽令本官
赴司倒又解部如有收買未足及侵費等弊速
拘本官的親家屬該府差人同去役押解本司
轉詳兩院究比此係

部院亟催毋視泛常蒙此前任本府湯知府將

姚光裕提取到官嚴加究比聞又蒙本司批據
本官呈稱前因及查姚光裕單開阮相阮應科
阮一兒阮應舉阮用於天啓三年四月內沈自
新沈得孫卞才張其彩曾至道於天啓三年八
月內各領去銀兩買鉛未經交運等情在卷該
本府署印姚同知將本官審稱天啓三年間因
差臨清買米未完不能兼理其事隨託南京應
天府浦子口住親人阮相阮應科阮一兒阮應
舉阮用沈自新沈得孫卞才張其彩本京羊皮
巷住魯至道共攬領鉛價三千餘兩替身代買
不料遷延年久不行買運止報鉛數支吾節蒙
上催以致陷身監比抄家難完各梟鯨吞漏網
法難輕縱乞賜關提各犯追比庶

國課蚤完蟻命復生等情在官據此看得鉛料軍
國之需豈容少緩姚光裕領銀辦納拖欠四載
比追百計一毫無償蓋緣本官先奉本府坐委
買米復奉本司派委買鉛二項俱屬緊急本官
孑然一身顧彼失此勢不得不假手於人夫小

民止知見金不愛於法藉此營求希沾微利寬
延時日展轉支吾又何暇計及於本官之受害
也况阮相等住居浦子口離此千餘里而本官
再此羈留無能奏手本府欲代彼設處勢不能
行悠悠歲月卒無濟事卽頻加敲朴斃此官於
杖下而於前料恐終無補也合無轉請撫院移
文提發阮相等就近追比庶軍需早完而奸宄
不致漏網矣等因到司據此該本司覆查看得
姚光裕領買鉛價三千九百餘兩花費無存比

追有年矣惟是本官嗷嗷告稱一身蒙委兩差
前銀托付親人阮相等代爲買運延捱不完致
陷囚比苦求移咨提追此雖本官支吾猾口似
不足憑但本官一身繫獄百計窮追徒加鞭朴
而料銀終屬不結之局相應准從請乞憲咨發
府差人前赴守提阮相等就近追比作速買運
庶錢糧蚤完而積案亦得清楚矣等因到院據
此看得姚光裕以一官而當兩差托人代辦情
亦近真然領銀三千九百餘兩不爲不多比追

四載不爲不久而厘鉛毫價香無影響豈其盡
爲光裕花費也耶本犯苦苦乞提稱有單券月
日可據阮相等俱在彼中難以懸斷况奴氛正
熾索鉛甚急

欽差守催勢不容緩既經該司呈請相應差官咨取
爲此合咨

貴府煩爲查照來文內事理希將後開有名人
犯着落該管衙門行提到官差同去役押發過
院以憑質審施行事干軍國急需請勿推諉

一 咨

應 天 府

天啓六年九月 十九 日

咨催湖廣絲價銀兩

爲補還借過絲價銀兩以便完銷事天啓六年十一月初六日准

戶部咨河南清吏司案呈奉本部送據川貴總督朱 咨前事等因到部送司案查天啓二年十月內四川總督張 向因援川那借河南絲價銀二萬兩相應補還本部屢檄河南及河南屢移文川省疾呼不應前項銀兩未補業有年矣今督部朱、聞訃守制前項銀兩爲本部未

准開銷恐前人所借後人未償終成不結之案
已經差官將楚中奉

旨解蜀兌帑數內分撥二萬兩補還河南司府收貯
外移會前來等因呈堂蒙批照行奉此隨于本
年八月二十八日咨行河南撫院并照會該布
政司速催補還去後今查兩月有餘未見解銀
到部相應仍咨催解以濟軍需等因呈堂蒙批
照行奈呈到部合咨貴撫院煩爲轉行司府卽
將川省補還絲價銀兩作速差官起解到部以

濟急需等因到院准此已經牌行該司轉行開
封府催解外今據該司呈據該府申稱卷查天
啓元年十二月內蒙原任四川總督張 因援
川借過本府京邊糧銀二萬兩募兵應用屢咨
四川尚未解補經今數載至今八月初十日方
奉本司劄付蒙本院案驗准

戶部咨准總督川貴部院朱 咨備奉

明旨先於楚中解還本府已蒙本院發下咨文差快
手夏大冬前赴湖廣守催至今未見解來今蒙

部催豈本府收訖故不解部耶抑本府尚有別項可贖前轍再那應也非藉憲文催促恐前銀未必刻期而解伏乞再發咨文促之庶本府可得藉手報部矣等因具申到司該本司看得本省去湖廣千有餘里所借絲價銀兩非得本院咨文屢催恐難卽至合候移咨差人守催庶前借銀兩可得結局矣等因具呈到院據此爲照惟正之供原有定額此有所借則彼有所欠何以應考成而免叅罰也向川省之不還亦緣此

帑之未至人皆苦其遠而不之解也今川貴兩院旣斟酌于就近之中將楚省應解蜀兌帑數內撥銀二萬兩補還河南在湖廣解役幸免跋涉途費之勞而河南有司得銷叅罰逋賦之案誠便計也前已咨催久未解來計部意謂前銀已到是以催之若此之急耳旣經該司呈請合再亟催爲此合咨

貴院煩爲檄行該司將前項應兌還銀二萬兩星馳差官與同差去員役押解前來轉解

戶部仍將差官職名起程日期回示施行萬勿
遲緩

一 咨

湖 廣 撫 院

天啓六年十一月 十三 日

咨催浙江馬價銀兩

爲例委救困事據河南布政使司呈蒙本院批
據大梁等驛南馬頭王臣等告稱臣等原籍浙
民僉派河南四十八驛行差工食出自浙省每
歲該銀一萬四千八百餘兩天啓七年應該差
官一員馬頭四名赴浙催取以濟驛困伏望天
台憐准批司投天上告等情蒙批布政司查報
蒙此已經票行宣武衛查取堪委廉能官員及
各驛殷實馬頭去後今據該衛呈送千戶王之

城堪以委用又據大梁驛結送馬頭江浦陳留
縣結送馬頭鮑文廩延驛結送馬頭王臣管城
驛結送馬頭方世奇各送到司該本司看得南
馬工食歲該一萬四千八百二十一兩五錢額
派浙江每年差官一員率領馬頭四人到彼守
催方解此從來之舊例也若不行催則經年不
解目今馬戶疲累至極嗷嗷稱苦催取誠不容
緩查得宣武衛千戶王之城承委勸劬堪以委
催除本司徑給咨文外合候詳示請給咨文給

付本官帶領馬頭江浦等四名齎赴

浙江樞院投下請文下浙江布政司催取天啓
七年額派銀一萬四千八百二十一兩五錢及
以前未完銀并萬曆四十四年起至天啓三年
未奉蠲免銀兩通限本年十月全完解司以憑
支放如過期官戒飭馬頭提家屬監比其差去
員役應用廩糧工食等項查照原議支給填循
環簿內以便稽查如本省馬頭不奉明文而朦
朧私催串通冒領銀兩者所在官司就將本犯

拿獲解回以憑轉呈究處施行等因具呈到院
據此爲照中州各驛係八省通衢官蓋往來絡
繹不絕供應浩繁常苦不繼其里工食不啻急
如星火據呈千戶王之城等赴彼催取天啓七
年并以前馬價銀兩相應准從合咨

貴院請照咨文檄行浙江布政司將前項銀兩
查照數目盡數徵完交付委官王之城馬頭江
浦等領押前來給散各驛以濟目前之急希將
給過銀數起程日期咨示查考

一
咨

浙江撫院

天啓七年二月 二十七 日

咨提追羅爲絃家屬

爲嚴催積逋以急軍興事據河南布政使司呈
據開封府申原任本府簡較犯官羅爲絃于萬
曆四十四年領銀三千九百兩四錢五分委買
工部黑鉛十萬一千五百五斤被羅堪誑銀一
千二百五十兩代買見今販鹽廣東又被程應
泰誑銀七百四十兩代買鉛料應泰病故伊男
程道五延指不完見奉部文督令移文原籍急
催業已屢次移咨羅爲絃原籍江西催取今准

吉安府關文蒙江西

兩院回文內稱該本府行據廬陵縣申稱已將
爲紘家產樂善堂欽嶺居沙嶺上田塘人口會
經爲紘親侄羅伯鳳賣與民人郭迪卽仰泉得
價三百兩又姊夫吳學章備還原資過銀二十
兩外助銀十兩共三百三十兩俱付伯鳳同差
役唐尚禮於天啓元年七月二十四日領資赴
河南開封府交納訖其見存未賣家產債召仍
行該縣嚴併家屬入等照開變價外奉發咨文

差人押同家屬生員羅伯朋伯鴻賚文前往南
直

巡撫應天都御史毛 投遞守取程應泰程道
五原領買鉛銀兩完納見奉轉發徽安道審追
又差家屬羅伯京裕生賚文前往廣東

巡撫兩廣都御史商 投遞守取羅堪原領買
鉛銀兩完納見奉轉發廣東布政司審追去後
俱未回報今准前因就經催據廬陵縣申稱依
蒙行委本縣主簿林中鳳協令家屬羅爲裳等

將爲絃未賣房屋田塘人口三面詳踏估計時
價七百零一兩五錢整及爲裳伯朋橋生伯仲
爲相等已分家產價值七十二兩開造文冊填
註銀數牒呈前來俱經併案拘集家屬人等到
縣隨該本縣張知縣審得羅爲絃於萬曆四十
四年間領官銀三千九百兩零四錢五分計買
鉛十萬一千五百零五斤迄今十有餘載鉛與
銀俱化烏有而爲絃亦久錮囹圄束手待斃已
矣會兩省

院司檄書星布爲絃家屬哀如克耳揆厥源流
揣摩關鍵爲絃之叔之兄之侄之親友人人猥
鏡也剥爲絃之膏誑爲絃之本垂涎爲絃之產
業臧獲殆非旦夕其所以徐徐悠悠疑有疑無
者待爲絃一日死耳爲絃死而誰問誰執誰遯
乎則今日必欲執爲絃之叔之兄之親友而問
其所借貸者若干遯其所陰施陽設者若干又
人人鬼蜮也閃遁百出抵飭萬端將何以結三
千九百之局乎合照前開數并近委估數除本

縣主簿林中鳳揭報房屋田塘男婦人口共估價七百零一兩五錢尚欠三千有奇也曩時羅堪分買鉛五萬斤已經河南開封府移咨直隸粵東兩處踪跡追償矣迺若羅爲裳之欠三百四十金也羅伯朋之欠八十五金也羅庚貳之欠八十金也羅伯騏之欠七十金也羅孚九之欠五十金也羅伯駿之欠十五金也羅中泰之欠五百金所當坐何允清何龍池名下協迫者也王魯生之欠一百四十五兩所當坐羅伯開

名下幫迫者也羅伯鳳之欠三百金所當坐郭仰泉郭公衡名下勒迫者也收拾煨燼悉索鬻息除羅堪程應泰外前後約計羅爲紘事產攤放漏卮共計二千二百八十六兩五錢銀兩豈云剜肉補瘡實曰楚弓楚得立限嚴追刻期變賣不特公帑無躍冶之儲胥而異獄亦無呻吟之怨骨不特朋奸無容肆其蜂蠆而一命亦且全其螻蟻矣且繇同未賣家產人口估定價值造冊申報到府該本府查詳看得羅爲紘饒有

資產散有錢債諸親識負心不認意蓋坐視其死而因以爲利耳不知爲紘雖死官錢難赦勢必着落親識代賠是諸人之擔愈重而牽累愈無已時也該縣旣已逐一查審明白應變價者責令速變應償還者嚴爲追還先解此二千二百八十餘金而餘俟羅堪程應泰補湊一以完公家之事一以救爲紘之命所當破情面任怨勞以始終厥美者也已經批行該縣嚴併家屬人等各名下照數勒追完日另移關報爲此合

關該府請照關文內事理希將羅堪程應泰程道五原領買鉛銀兩已奉

江西撫院移咨河南知會并南直廣東二處守取煩爲申詳貴省兩院請咨徑行二處協催庶得早完不致久延等因備關到府准此案照羅爲紘原奉本司坐委領買鉛銀三千九百兩有奇久延未納致蒙嚴催監比多年完納不前屢請咨文前赴本犯原籍變產今准該省吉安府回稱已有變產并償還本犯銀共二千二百八

十餘兩尚有羅堪程應泰分買本犯鉛銀一在
粵東一在徽州兩相隔別不便行追今准前因
合候轉達詳示俯再請發咨文差人赴彼協守
催取燕前銀早完等因到司查得詳內尚未分
析羅堪程應泰分買本犯鉛銀緣絲隨行覆查
去後今據前因該本司看得羅爲紘花費鉛銀
屢行江西原籍變產據報議追二千二百有奇
無復再議惟是本犯呶呶告稱羅堪分買鉛銀
一千二百五十兩商益廣東程應泰領銀七百

四十兩伊男程道五籍在徽州各犯逃避不完
雖經移文坐守告追兩地隔別難免泰越之視
前銀終無完期必再懇請憲咨發下分投差人
各赴守催庶可濟事結局矣等因具呈到院據
此爲照羅堪原收官銀一千二百五十兩程應
泰原收官銀七百四十兩均代羅爲紘協買黑
鉛以供軍需者也陽爲分勞陰則營利鉛旣不
買銀復無歸鼠竄兔脫隔別數千餘里機深計
狡支吾一十二年奸貪殊異于尋常督追須籍

于嚴威倘非

貴部院就近催比恐官銀久欠殘局終不得結而奸徒得計法令竟莫能伸矣擬合移咨爲此
合咨

貴部院煩照咨內事理希爲檄下布政司嚴提羅堪到官將原侵銀一千二百五十兩速行追完如有不足仍希添差員役連人并銀贖解過省以憑查追施行勿請遲緩

一 咨

兩廣部院

合咨

貴院煩照咨內事理希爲檄下徽安道嚴提程應泰男程道五到官將原侵銀七百四十兩速行追完如有不足仍希添差員役連人并銀贖解過省以憑查追施行請勿遲緩

一 咨

應天撫院

天啓七年三月

十六

日

咨催題豁潁川運軍

爲隔省飛差紊亂

祖制等事案照天啓六年十一月內准

工戶二部咨該潁川衛軍張邦紳等奏免運糧緣
繇奉

旨下部移咨前來已經會同

貴部院轉行潁川睢陳道勘議去後已經多日
未據呈報但該衛官軍原係

京營薊州大同班軍卽今薊州大同兩鎮修邊基

急奉

旨不分春秋一併上班

京營各軍修建

宸極目下起程一日不敢稽遲一名不容缺額供運
漕糧恐不能有分身之術而漕事關係

國儲何可容其耽延計非早為分派未免上下兩
妨及查潁川兌米八千石其山東遮洋二總中
都一總內鳳陽宿州等衛共約運船千餘隻若
每船分運不數石則八千石米時間搬盡似非

各船之累事宜早定惟

貴部院裁之合再移會為此合咨

貴部院請照原准

部文希為行文該道查酌議報通詳覆議會題
施行

一 咨

總漕部院郭

天啓七年五月

初七

